

ASO LUA, 17 TESEMA 2013

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2013.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai le Malelega Mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloaina ai Tulafono Tau Faaofi ua faaalua iinei.

- 1. Tulafono Tau Faaofi o le Faamasinoga mo Mataupu Faatatau i Aiga 2013.**
- 2. Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2013.**
- 3. Tulafono Tau Faaofi o Teuteuga o le Tulafono o Fefaatauaiga Talafeagai 2013.**
- 4. Tulafono Tau Faaofi o Tagata Tomai Tau Palama 2013.**
- 5. Tulafono Tau Faaofi o le Faatatauina o Tupe Faaopoopo (Nu.1) 2013/2014.**

TUUINA ATU i lou nei Lima i leni Aso Gafua 16 o Tesema i le tausaga 2013.

**(Sainia): Tui Atua Tupua Tamasese Efi
O LE AO O LE MALO.”**

17 TESEMA 2013

SAUNOAGA O MALIU

1. *Na faasilasila e le Fofoga Fetalai le maliu o le Tofa LEFUA Leaana, o le sa avea ma sui usufono filifilia o le itumalo faaalaalafaga o Vaisigano Nu.2.
Na uluai filifilia mai le Tofa LEFUA Leaana i le Faiga Palota o le Paeaiga i le tausaga e 1982-1985.
Sa toe filifilia mai foi le Tofa LEFUA Leaana i le Paeaiga o le 1985-1988.
Sa avea le Tofa LEFUA Leaana ma sui usufono o le Komiti o le Maota i le tausaga 1982-1985.
O le Tofa LEFUA Leaana o se sui o le Vaega Faaupufai Soofaatasi.*

2. *Na faapea foi ona faasilasila e le Fofoga Fetalai le tuumalo o le Afioga LEOTA TOOMATA Siaki, o le sa avea ma sui usufono o le itumalo Faaalaalafaga o Anoamaa Sisifo.
Na filifilia mai le Afioga LEOTA TOOMATA Siaki i le Palemene i le Paeaiga o le tausaga 1967-1970.
Na avea le Afioga LEOTA TOOMATA Siaki ma sui o le Komiti o Tulafono Tumau ma le Komiti o Talosaga.*

3. *Na faapea foi ona faaaogaina e le Fofoga Fetalai lea avanoa i le tulaga aloaia e faasilasila ai le faaaloologia o le tuua o le Malo e se tasi o Taitai iloga o le lalolagi, o le sa avea ma Peresetene o le Atunuu o Aferika i Saute, Susuga NELSON MANDELA.
O ia o se Taitai logologoa, ma o se Taitai na ia faataatia se alafua lelei e atagia ai faiga, o tu ma aga faa-Taitai e tausisia le manulauti o le faamuamua o le manuia o ona tagatanuu ma ia saoloto mai faiga faailoga lanu ma le faaituau.
O lona soifua auauna i lona atunuu ma lona Malo ua tino mai ai ma le sootaga vavalalata a lo tatou Malo o Samoa ma le Malo o Aferika i Saute e ala lea i lo tatou felagolagomai ma le galulue faatasi i lalo o le fu'a a Malo o le Taupulega ma Malo Aufaatasi i le tatou tu ma le aga masani i le va nonofo ma le va fealoaloai. Ua talafeagai ai ona faaaloologia ma amanaia le valaau paia a le Atua i lenei Taitai aoga mo le lalolagi atoa, aemaise le mafutaga vavalalata a Aferika i Saute ma le Malo o Samoa.

Na tutulai filemu le Maota e faaali ai le faaaloalo i sui usufono ma le sa avea ma Peresetene o le Malo o Aferika i Saute ua tuumalo.*

ISI FAASILASILAGA A LE FOFOGA FETALAI

FOFOGA FETALAI: E manatu e le o toe po malae i le silafia a lenei Maota ma le faafofogaaga a le atunuu ona o le faasalalauina faasolitulafono e nisi o nusipepa o Lipoti ma Faamaumauga a le Palemene, a o sea Lipoti ua maea ona taofia atu e le Fofoga Fetalai ma le Ofisa o le Fono Aoa o le faasalalauina ona o lo o agai i ai saililiga ma galuega faatino a le Palemene. O lea e tusa ai ma tu ma aga masani a le Maota e pei ona aiaia i lalo o Tulafono Tumau aemaise o Tulafono Faavae e pulea ai le aloaia o pulega faa-Palemene o lo o limataitaiina ai le faagasologa o galuega faatino a le Maota Fono o Samoa. O lenei mataupu ua atagia ai le le usitaia ma le le aloaia o le Palemene a Samoa e i latou na faasalalauina lenei Lipoti.

Ua taulimaina nei e le Fofoga Fetalai ma le Ofisa o le Fono Aoa o le Fofoga Fetalai ni fautuaga ma ni faamalamalama a le Loia Sili a le Malo e uiga i lenei mataupu ma ua faamaonia ai le solia o Tulafono Faavae e limataitaiina ai le faagasologa o galuega a le Maota.

Ua ou matauina foi ma le faanoanoa tele nisi o finagalo o sui usufono i a latou tu ma aga i le Maota, ua latou agai pea e faatuputeleina pea le le femalamalamaai aemaise le le faaaloogia ma le le amanaia o le finagalo o le Fofoga Fetalai aua le puipuia o le mamalu ma le taualoa o le Palemene.

E le mama ia te au o le Fofoga Fetalai le mataupu lenei aua ou te talitonu e malu le Nofoa o le Fofoga Fetalai o le Palemene o Samoa i a outou afioga i Alii ma Tamaitai sui usufono. E pei ona outou matauina o lo o faagasolo pea a tatou galuega i lo tatou va nonofo, le va fealoaloai ma le va tapuia, ae ou te manatu e tataua ona fuafua mai o lea foi e fuafua atu.

Le paia ma le mamalu o le Maota, tau ina ou faamanatu le itu lenei. E leai se isi e fia niuali pe fia tagata iloa, ae tasi le manulauti, ia tumau le mamalu o le Palemene o le atunuu aemaise le Nofoa o le Fofoga Fetalai o le Maota o Samoa. O lou le faaaloalo ma le amanaia faiga faavae a le Palemene o le atunuu ma faiga faavae i le mamalu o le Fofoga Fetalai, o lou le ava foi lea ia Samoa atoa ma lana tapuaiga. O le faamanatu, tau ina ia fua se tapu ma ia aua, aua ne i toe tulai mai ni amioga faapenei mo le faagasologa o a tatou galuega i le lumanai.

Ua ou tuuina atu lenei mataupu i aao o le Loia Sili a le Malo aua le faatinoina o tulaga talafeagai ina ia aua ne i toe tulai mai se mataupu faapenei ma ia fai ma aoaoga mo le lumanai.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai o le mea e fia faamalamalama ma lou faaaloalo lava.

FOFOGA FETALAI: Malie lau Afioga i le Taitai o le Itu Agai, e i ai le avanoa mulimuli ona o lea e faagasolo a tatou galuega.

TUUINA ATU O PEPA

Na tolaulauina e le Failautusi Pepa ua tuuina atu e tusa ai ma le T.T.48:

1. S.R.2013/8, Poloaiga Aoa o Tau o Oloa (Nu.4) 2013.
2. S.R.2013/9, Tulafono Faatonutonu o Teuteuga o Tulafono Faatonutonu o Faalapotopotoga a le Malo (Faatinoga o Galuega ma le Mafai ona Tali atu) 2013.
3. S.R.2013/10, Tulafono Faatonutonu o Teuteuga o Tulafono Faatonutonu o Faalapotopotoga a le Malo (Faatinoga o Galuega ma le Mafai ona Tali atu) (Nu.2) 2013.
4. P.P.2013/2014 Nu.45, Lipoti Faaletausaga a le Faletupe Tutotonu o Samoa mo le Sefululua Masina Iulai 2011-Iuni 2012.
5. P.P.2013/2014 Nu.46, Lipoti Faaletausaga a le Faalapotopotoga o Mea tau Fale a Samoa mo le tausaga 2012.
6. P.P.2013/2014 Nu.47, Lipoti Faaletausaga a le Matagaluega o le Soifua Maloloina mo le Tausaga Faaletupe 2010-2011.
7. P.P.2013/2014 Nu.48, Lipoti Faaletausaga a le Matagaluega o le Soifua Maloloina mo le Tausaga Faaletupe 2011/2012.
8. P.P.2013/2014 Nu.49, Lipoti Faaletausaga a le Pulega o Tineimu ma Faalavelave Tutupu Faafuasei mo le Tausaga 2009-2010.
9. P.P.2013/2014 Nu.50, Lipoti Faaletausaga a le Pulega o Tineimu ma Faalavelave Tutupu Faafuasei mo le Tausaga 2010-2011.
10. P.P.2013/2014 Nu.51, Lipoti Faaletausaga a le Pulega o Tineimu ma Faalavelave Tutupu Faafuasei mo le Tausaga 2011-2012.
11. P.P.2013/2014 Nu.52, Lipoti Faaletausaga a le Komisi o le Toefuataiga o Tulafono a Samoa Iulai 2011-Iuni 2012.
12. P.P.2013/2014 Nu.53, Tali atu a le Malo i le P.P.2012/2013 Nu.35, Lipoti a le Komiti o Mataupu tau le Va i Fafu, Fefaatauaiga ma Tupe Maua i le P.P. 2011/2012 Nu.31 & P.P.2011/2012 Nu.45, Lipoti Faaletausaga a le Pulega o Tupe Faava o Malo a Samoa mo le tausaga faaletupe faaiuina aso 30 Iuni 2008 ma le tausaga faaletupe faaiuina aso 30 Iuni 2009.
13. P.P.2013/2014 Nu.67, Lipoti a le Usugafono a le Palemene o Samoa i le Fonotaga Lona 59 a le Faalapotopotoga o Palemene o Malo o le Taupulega sa usuia i Aferika i Saute.
14. P.P.2013/2014 Nu.68, Lipoti o le Usugafono a le Palemene a Samoa i le Fonotaga Faale-Aoaoga Faa-Palemene a Atunuu o le Pasefika, Nukualofa, Tonga, 7-8 Novema 2013.
15. P.P.2013/2014 Nu.69, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe Iulai 2011-Iuni 2012.
16. P.P.2013/2014 Nu.70, Lipoti Faaletausaga a le Matagaluega mo Tupe Maua mo le Tausaga 2012-2013.

17 TESEMA 2013

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).

1. P.P.2013/2014 Nu.55, Lipoti a le Komiti o Tupe Maua ma Tupe Totogi i le Tulafono Tau Faaofi o Faiga Aloaia e Totogi ai Tupe a le Atunuu 2013.
2. P.P.2013/2014 Nu.56, Lipoti a le Komiti mo Ofisa o le Palemene i le P.P.2012/2013 Nu.13, Lipoti a le Pule ma Suetusi Sili i le Fono Aoao Faitulafono mo le tausaga Iulai 2009-Iuni 2010 & P.P.2013/2014 Nu.12, Lipoti a le Pule & Suetusi Sili i le Fono Aoao Faitulafono mo Iulai 2010-Iuni 2011.
3. P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaletausaga a le Faalapotopotoga a le Malosi Faa-Eletise mo le Tausaga 2010/2011.
4. P.P.2013/2014 Nu.58, Lipoti a le Komiti o Galuega, Felauaiga ma Sioiomaga i le P.P.2011/2012 Nu.65, Lipoti Faaletausaga a le Pulega o Malae Vaalele a Samoa mo le Tausaga 2008/2009 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga 2009/2010.
5. P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Lauelele mo le Tausaga 2009/2010.
6. P.P.2013/2014 Nu.60, Lipoti a le Komiti o Galuega, Felauaiga ma Sioiomaga i le Tulafono Tau Faaofi o Aperenitisi 2013.
7. P.P.2013/2014 Nu.61, Lipoti a le Komiti o Aoga, Saienisi, Fesootaiga & Faamatalaga Tekonolosi i le Tulafono Tau Faaofi o le Komisi o le Gagana Samoa 2012.
8. P.P.2013/2014 Nu.62, Lipoti a le Komiti o Aoga, Saienisi, Fesootaiga & Faamatalaga Tekonolosi i le P.P.2011/2012 Nu.34, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2009/2010.
9. P.P.2013/2014 Nu.63, Lipoti a le Komiti o Aoga, Saienisi, Fesootaiga & Faamatalaga Tekonolosi i le P.P.2011/2012 Nu.55, Lipoti faaletausaga a le Iunivesite Aoao o Samoa mo le Tausaga 2009/2010.
10. P.P.2013/2014 Nu.64, Lipoti a le Komiti o Aoga, Saienisi, Fesootaiga & Faamatalaga Tekonolosi i le P.P.2011/2012 Nu.56, fuafuaga Autasi a le Faalapotopotoga o Suesuega Faasaienisi a Samoa mo le Vaitaimi 2012-2014.

*17 TESEMA 2013***Tuuina atu o Lipoti a Komiti Filifilia**

11. P.P.2013/2014 Nu.65, Lipoti a le Komiti o Aoga, Saienisi, Fesootaiga & Faamatalaga Tekonolosi i le P.P.2011/2012 Nu.58, Fuafuaga Autasi a le Falemeli mo le Vaitaimi 2012-2014 & P.P.2011/2012 Nu.59, Faamatalaga o Falemeli mo le Vaitaimi 2012-2014.
12. P.P.2013/2014 Nu.66, Lipoti a le Komiti o Aoga, Saienisi, Fesootaiga & Faamatalaga Tekonolosi i le P.P.2012/2013 Nu.6, Lipoti Faaletausaga a le Matagaluega o Aoga, Taaloga ma Aganuu mo le Tausaga 2008/2009, P.P.2012/2013 Nu.7, Lipoti Faaletausaga a le Matagaluega o Aoga, Taaloga ma Aganuu mo le Tausaga 2009/2010 & P.P.2012/2013 Nu.8, Lipoti Faaletauaga a le Matagaluega o Aoga, Taaloga ma Aganuu mo le Tausaga 2010/2011.
13. P.P.2013/2014 Nu.71, Lipoti a le Komiti o Galuega, Felauaiga & Siosiomaga i le Tulafono Tau Faaofi o Teuteuga o le Tulafono o le Faalapotopotoga o le Malosi Faa-Eletise 2012.

Afioga Hon Palusalue Faapo II: Lau Afioga i le Fofoga Fetalai, e na o se tatalo atu lava mo se avanoa faamolemole.

FOFOGA FETALAI: O le a lau mataupu le Taitai o le Itu Agai?

Afioga Hon Palusalue Faapo II: E lua mataupu ia ou te fesili ai ou te fia malamalama ai.

FOFOGA FETALAI: E lei oo i le taimi o tatou felafolafoaiga. Ou te tuu atu lava le avanoa pe a tatou.....E le mafai o lea foi o le a soli le tatou fono o lea e amata atu le tatou polokalame o le taeao.

LAFO A LE KOMITI FAAPITOA MO SUESUEGA

FOFOGA FETALAI: Ou te tapa lau Afioga i le Taitaifono o le Komiti e tulai mai, lau Afioga i le Taitaifono.

Afioga LAUTAFI FIO SELAFI PURCELL (Taitaifono o le Komiti Suesue Faapitua): Faafetai atu i lau Afioga i le Fofoga Fetalai mo le avanoa.

E muamua ona momoli atu le faamalo ma le faafetai i lau Afioga i lena taeao i le tatou viiga ua e siitia i lo tatou Tapaau Sili, aua Lana tausiga ma lona alofa mutimutivale ia i tatou. Faamalo atu foi i le tatou Palemene o le tatou Fono Tatalo i le taeao ua mavae.

Ae lei faia se upu a le Taitaifono ou te fia faatalofa atu i le mamalu o le Maota i lena taeao fou, i le afio o lau Afioga i le Fofoga Fetalai, le afio o lau Afioga i le Palemia ma le mamalu o le Kapeneta, Taitai o le Itu Agai ma lena itu, afio o Minisita Lagolago ma sui usufono mamalu uma.

17 TESEMA 2013

Lafo a le Komiti Faapitoa mo Suesuega

E faatalofa atu foi i le faafofogaaga ma le tapuaiga a Samoa i leni taeao mai lava i mauga tetele seia paia maugaiti. E faatalofa faapitoa atu foi i sui ma faaululuga o le tatou Malo ua mafai ona faatasi mai i leni taeao.

Ia ua maua foi leni avanoa e faatalofa atu ai isi ou itumalo o Satupaitea, malo le tauivi i leni tausaga ua faaiuiu, ma lo outou lagolagosua i lau tatalo faipea e maua ai pea se leo o le auauna i totonu o le Maota leni.

Lau Afioga i le Fofoga Fetalai, ua ou tulai atu i le ava ma le faaaloalo, ona o le faatonuga a le Fono Aoa o le aso 24 o Iuni o le tausaga nei, ato ai ma se Lafo na faamaonia i le aso 6 o Aokuso. Ina ia tuuina mai se lipoti a le Komiti Suesue Faapitoa leni i le Maota leni i le aso i le aso 17 o Tesema i le mataupu e pei ona silafia.

Lau Afioga i le Fofoga Fetalai ma le mamalu o le Maota, ou te tautino atu ma le agaga faaaloalo ma le agaga moni, sa galulue lava le Komiti leni i le mea e gata ai le galulue ina ia taumafai ina ia usitaia le faatonuga a le Maota, ma ia maua mai le lipoti i ana suesuega i leni mataupu. Peitai ane ua le ogatasi le faamoemoe ma le faatinoga o galuega maeaea a le Komiti i le tau aoina mai lea o se Lipoti atoatoa ma le maioio i luma o le Maota. E le foi i lea lau Afioga i le Fofoga Fetalai pei ona silafia e le Maota nei, o lo o i ai lava se mataupu ua aafia ai le sui usufono mamalu faapea foi le Matagaluega lava leni o lo o fai i ai suesuega a le Komiti, o lo o faaauau pea i luma o le Faamasinoga, ma o lo o faaauau pea i le taimi nei.

Ou te fia talosagaina ai le mamalu o le Maota leni i la outou tofa faatupu ma la outou tofa faapalepale i lau Afioga i le Fofoga Fetalai, le Taitai o le Malo faapea le nofo a Minisita, le Taitai o le Itu Agai faapea le mamalu o sui usufono mamalu uma, ina ia toe faaopoopo se taimi ina ia maua mai ia se lipoti atoatoa i luma o le Maota. Ou te talosagaina la outou tofa faapalepale ina ia amanaia ai se lafo ou te faatuina e faapenei, *Ina ia faaopoopoina se tolu masina e faamaea lelei ai galuega ua faatonuina ai le Komiti Suesue Faapitoa ma lipoti mai i le Fonotaga ia Mati 2014. E le gata i lea e pei foi ona silafia e le Palemene, o lo o faagasolo tualumaga o le Faamasinoga e aafia ai le sui usufono mamalu ma le Matagaluega o Tupe i le taimi nei.*

O le lafo lea ma lou faaaloalo lava.

E le i faaluaina le lafo.

Susuga Hon Tuilaepa Fatialofa Lupesoliai Aiono Neioti Sailele Malielegaoui (Palemia): Lau Afioga i le Fofoga Fetalai.....

FOFOGA FETALAI: Ia, o lea ua faatuina le lafo - ae tulai mai lau Afioga i le Palemia.

17 TESEMA 2013

LAFO TOE TEUTEU

Susuga Hon Tuilaepa Fatialofa Lupesoliai Aiono Neioti Sailele Malielegaoi: Po o avanoa ona ou tu atu e fai se lafo teuteu, o le tasi lenei Komiti e ese le fai mea atoatoa, o le ala foi lea o le tuai ai o le latou Lipoti ona aumai, na o nai upu lava ia, *Ia le i lalo ifo o le 3 masina, a toe sefulu tausaga o fai pea la outou galuega, e leai se mea o i ai, a o le faaopoopoga, ia le i lalo ifo o le 3 masina.*

FOFOGA FETALAI: Ia o lea ua faatuina le lafo. Sei tulai mai le sui usufono mamalu. Tulai mai le sui usufono mamalu.

Tofa Levaopolo Talatonu (Gagaemauga Nu. 2): Lau Afioga i le Fofoga Fetalai....

FOFOGA FETALAI: Sei tulai mai le sui usufono mamalu.

Tofa Levaopolo Talatonu: Ia e faamalulu atu i lau Afioga leai ona o le mataupu tonu lea o lea e tulai mai ia te au. Ma ou te tatalo atu lava i lau Afioga i le Fofoga Fetalai sei faasao mai au pe afai ou te sese i le tulaga lea o taualumaga o iloiloga o mataupu faapenei. E i ai lava le manatu ia te au e le feaiaai galuega a le Palemene ma galuega a le Faamasinoga, ae sa i ai la le talitonuga faapea o le aso o le a aumai ai le Lipoti lea i totonu ma le agaga faaaloalo.

FOFOGA FETALAI: Ia o lea ua maua le finagalo o le sui usufono, ia o lo o atagia i lalo o a tatou Tulafono Tumau. O le vafealoaloai lena a le Palemene ma le Maota Fono lenei, a tagofia loa se mataupu e le Faamasinoga, ia e le mafai ona toe tautalagia i totonu e pei o a tatou tu ma aga masani. O le ala lea o le tulai mai o le sui usufono mamalu ona o lea lava e lei maea taualumaga o le Faamasinoga o lo o aafia ai lau Afioga i le sui usufono mamalu aemaise o le Matagaluega, seiloga e maua mai le Iuga ma taatia i lagatonu ua maea le galuega a le Faamasinoga, ona faaauau ai lea o galuega faatino a le Maota.

Ia ua faatuina le lafo ma ua toe teuteuina, ia le i lalo ifo o le tolu masina. E i ai se isi e faaluaina le lafo?

Faaluaina e se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow ma se tasi o sui usufono mo Vaimauga Sisifo, Tofa Lenatai Victor Fafai Tamapua.

Na faamaonia le lafo mo le toe tuuina atu o se taimi e lē itiiti ifo i le tolu masina e faamaea ai galuega ua faatonuina ai le Komiti Suesue Faapitoa.

17 TESEMA 2013

**TULAFONO TAU FAAOFI O LE FAATATAUINA O TUPE
FAAOPOOPO (NU. 1) 2013/2014 – faitauga muamua**

FOFOGA FETALAI: Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu. 1) 2013/2014 i lona faitauga muamua.*

Faaluaina e le Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nu'u ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TALA FAATATAU O TUPE FAAOPOOPO (NU. 1) 2013/2014, P.P.
2013/2014 NU. 54 – faataatia i luga o le Laulau a Fono**

Na faataatia i luga o le Laulau a Fono e le Afioga Hon Faumuina Tiatia Faaolatane Liuga, Minisita o Tupe le Tala Faatatau o Tupe Faaopoopo (Nu. 1) 2013/2014 e tusa ai ma le T.T.131(1).

**TULAFONO TAU FAAOFI O LE FAATATAUINA O TUPE
FAAOPOOPO (NU. 1) 2013/2014 – lafo mo le faitauga faalua**

FOFOGA FETALAI: Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ou te faatu le lafo, *Ina ia faitauina le Tulafono Tau Faaofi o le Faatatauina o Tupe Faaopoopo (Nu. 1) 2013/2014 i lona faitauga faalua.*

Faaluaina e le Minisita mo Tina ma Tamaitai, Atinae o Nu'u ma Afioga ma Agafesootai.

**SAUNOAGA I LE TALA FAATATAU O TUPE FAAOPOOPO
2013/2014 NU. 1**

FOFOGA FETALAI: Tulai mai lau Afioga i le Minisita o Tupe.

17 TESEMA 2013

**Saunoaga i le Tala Faatatau o Tupe Faaopoopo
2013/2014 Nu.1**

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ma le mamalu o le Palemene, e ia te au le ava ma le faaaloalo tele e avea ai au ma sui o le Malo e tuuina atu i luma o le Laulau a Fono a le Palemene le Tala Faatatau Faaopoopo Muamua o le Tupe 2013/2014.

Lau Afioga i le Fofoga Fetalai, i le tapenaina o lenei Tala Faatatau Faaopoopo Muamua o le Tupe, o lo o taulai lava lona faavaeina i le mauaa ma le mausali o le tamaoaiga e ala i le faaauauina pea o polokalame ma atinae faamuamua a le Malo i totonu o se siosiomaga talafeagai e poupuai lo tatou tamaoaiga.

Mo le silafia e sui usufono o le Palemene, o lo o tele pea luitau o lo o feagai ma lo tatou Malo i le tau faasoasoina o ana tupe maua i tausaga taitasi. O lo o maitauina lea itu i vaega faaopoopo mo Matagaluega ma Faalapotopotoga Tumaoti a le Malo e ala i lenei Tala Faatatau Faaopoopo Muamua o le Tupe.

E tumau pea le naunautaiga o le Malo ina ia ausia le tapulaa o le faasiliga o tupe faaalu i tupe maua, budget deficit e 3.5% i totonu o le tolu tausaga o lumanai. I le maea faatulaga ai o tupe maua ma tupe faaalu faaopoopo e ala i lenei Tala Faatatau Faaopoopo Muamua o le Tupe, ou te fiafia e faailoa atu, o lea ua pau maualalo nei le faasiliga o tupe faaalu i tupe maua, budget deficit mai le 4.8% sa i ai i le Tala Faatatau Autu o Tupe 2013/2014 i le 4.2%. Ma o se pine faamau lea o le faatauaina e le Malo o le vave ausia o le tapulaa e 3.5% e pei ona faailoa atu muamua.

Tala Faatatau Faaopoopo Muamua o le Tupe.

O le a ou auililiina atu loa vaega o lo o aofia i lenei Tala Faatatau Faaopoopo Muamua o le Tupe mo le Tausaga Faaletupe 2013/2014.

Aotelega o Tupe Maua.

I le vaega o Tupe Maua, e le o i ai se fuafuaga a lo tatou Malo e siitia lafoga e faatupe ai le Tala Faatatau Faaopoopo o Tupe 2013/2014, sei vagana ai tupe faaopoopo ua mafai ona faamauina mo vaega ua taua i lalo.

O le a siitia tupe faameaalofa mai a tatou paaga i le maea faalauiloa ai o le fesoasoani tuusao a le Faletupe o Atinae a Asia i le Tala o le Tupe a le Malo, e pei ona faamatuu mai ai le \$22.6miliona. O lea vaegatupe sa faamauina muamua o se nonogatupe mama tului i le Tala Faatatau Autu o le Tupe 2013/2014, a o lea ua suia nei o se meaalofo tuusao a le Faletupe o Atinae a Asia.

O isi tupe faaopoopo o le a mafai ona aoina mai ai vaega nei:

- Totogi o aitalafu tuua mo le lifiina o maota o le Malo.
- Lafoga o le VAGST mo Matagaluega a le Malo.

17 TESEMA 2013

**Saunoaga i le Tala Faatatau o Tupe Faaopoopo
2013/2014 Nu.1**

- **Tupe faasao o le a toe fetuunai e faatino ai isi galuega manaomia mo le Komisi o Tagata Faigaluega a le Malo ma le Ofisa o le Fono Aoaofaitulafono.**

AOTELEGA O TUPE FAAALU.

Lau Afioga i le Fofoga Fetalai, o leni Tala Faatatau Faaopoopo (Nu.1) o le Tupe 2013/2014 ua tapenaina mo le faamoemoe ina ia faatupe ai nisi o atinae ma polokalame faamuamua a le Malo i lona aotelega e \$14.42miliona e aofia ai ma lafoga. Ma e tumau pea le talitonuga o nei atinae o le a saga uunaia ai pea Matagaluega ma Faalapotopotoga a le Malo ina ia faaleleia atili ai le faatinoga o le tautua ma le auaunaga i le atunuu.

Ou te ototoina atu faapenei vaegatupe ua faaagaaga mo Matagaluega ma Faalapotopotoga a le Malo e ala i leni Tala Faatatau Faaopoopo (Nu.1) o le Tupe:

Siitaga o totogi o le aufaigaluega a le Malo, e \$2.72miliona se vaegatupe faaagaaga e le Malo mo le siitaga o totogi e 3% mo le aufaigaluega a le Malo. O lea siitaga e amata faamamaluina i le aso 1 Ianuari 2014.

Matagaluega o Fesootaiga & Faamatalaga Faatekonolosi.

E \$180,000 se vaegatupe o le a faamatuuina atu e le Malo e fesoasoani ai i le faaauuina o le poloketi mo le faaleleia o le tulaga tau fesootaiga i luga o le internet. O lea vaegatupe o le a faaopoopo i le \$500,000 o lo o i ai nei i le Tala Faatatau Autu o le Tupe 2013/2014 a le Matagaluega mo leni lava faamoemoe.

Matagaluega o Aoga, Taaloga & Aganuu.

O le a faamatuuina atu se vaegatupe e \$318,000 ina ia toe fetuunai ai totogi o faiaoga e fua i le faatulagaga o totogi o faiaoga sa pasiaina e le Malo i le tausaga e 2010. E \$230,423 se vaegatupe faaopoopo mo vaega fou mo le Matagaluega o Aoga, Taaloga & Aganuu. E \$190,000 lea ua fuafuaina mo le polokalame faatino a le Orchestra a Samoa.

Matagaluega o Tupe.

E \$285,000 ua faaagaaga e le Malo e faatino ai siitaga e \$5 i le masina mo le penisione a tagata matutua. O le a toe faaopoopoina foi e le Malo se vaegatupe e \$5miliona e faaauau ai galuega ma tapenaga manaomia mo le taligamalo a Samoa i le fonotaga a atunuu laiti o le lalolagi i le tausaga fou e 2014. O lea vaegatupe e faaopoopo i le \$15miliona sa faatatauina i le Tala Faatatau Autu o le Tupe 2013/2014. E \$87,365 se vaegatupe ua faaagaaga mo le sueina o tusi o poloketi ua maea faatinoina e le Malo.

17 TESEMA 2013

**Saunoaga i le Tala Faatatau o Tupe Faaopoopo
2013/2014 Nu.1**

Matagaluega o le Soifua Maloloina.

E \$150,000 le tupe faaopoopo a le Malo ua tuuina atu e fesoasoani ai i galuega faatino a le Iunivesite Faa-Fomai (OUM) i Motootua.

Matagaluega o le Punaoa Faalenatura ma le Siosiomaga.

E \$653,515 se vaegatupe ua faaagaaga mo aitalafu tuua a le Matagaluega mo le totogiina o le lisi o le Maota o le Malo, TATTE Building. E \$1miliona se vaegatupe o le a faamatuuina atu mo le totogi o elele o lo o faaogaina nei e le Malo mo atinae faapea elele faasao.

Matagaluega o Leoleo ma Falepuipui.

O le a faamatuuina atu e le Malo se isi vaegatupe faaopoopo e \$500,000 mo le tau o fanua o le STEC o lo o faaogaina nei e le Matagaluega mo nofoaga tutotonu o aoaoga toefuaiga i Olomanu. E \$120,000 se vaegatupe faaagaaga mo le fausia o potu faaopoopo mo le toese i Tafaigata.

Matagaluega a le Palemia ma le Kapeneta

E \$200,000 lea ua toe faaopoopo mo le tapenaga o le taligamalo a Samoa i taaloga a Tupulaga o Malo o le Taupulega 2015.

Matagaluega o Tina ma Tamaitai, Atinae o Nuu ma Agafesootai

E \$470,000 se vaegatupe faaopoopo mo le faaauuina o le polokalame o vai tumaoti.

Ofisa o le Fono Aoaofaitulafono.

E \$40,000 se vaegatupe ua faaagaaga mo polokalame faale-aoaoga a le fanua lea o lo o faatinoina nei e le Ofisa o le Fono. O le a faamatuuina atu se vaegatupe e \$80,000 e fesoasoani ai i le tapenaga a le Matagaluega mo lana taligamalo i le Fonotaga Lona 45 a Fofoga Fetalai ma Failautusi o le Fono a lenei itulagi.

Komisi o Tagata Faigaluega a le Malo.

E \$76,620 se vaegatupe faaopoopo mo le totogiina o laisene o polokalame computer mo mataupu tau tagata faigaluega.

E \$243,000 mo le totogi fuapau e avea ai ma Sui o le Faalapotopotoga a le CADAM.

Ofisa o Fuainumera Faamauina.

E \$167,349 ua faaopoopoina mo le faamaeaina o suesuega o tupe maua ma tupe faaalu.

Auaunaga Faa-Soifua Maloloina.

E \$1miliona lea ua faaopoopoina nei mo le polokalame o togafitiga i nuu mamao, lea o lo o faaagaaga i ai le \$10.5miliona i tausaga taitasi.

17 TESEMA 2013

**Saunoaga i le Tala Faatatau o Tupe Faaopoopo
2013/2014 Nu.1**

Lau Afioga i le Fofoga Fetalai ma le mamalu o le Fono, o le auiliiliga lena o vaega taua o lenei Tala Faatatau Faaopoopo 1 o le Tupe 2013/2014.

E pei lava ona maitauina e sui usufono o le Palemene i lau folasaga amata, e le i faigofie lenei tapenaga i le Malo, ona o le naunautaiga lava ina ia faatupe lava na o galuega e mafai ona gafatia i tupe o lo o maua e le Malo. Ma e ui i le tele o suiga lelei ua vaia i le tamaoaiga i lenei vaitau, o le mea moni o lo o tatou soifua ma ola i se siosiomaga le mautonu. Ona o lea tulaga, o le a faaauau pea ona maitauina lelei galuega faatino a Matagaluega taitasi o le Malo ina ia mautinoa ai o lo o sologa lelei fuafuaga uma mo le faamautuina o se tamaoaiga malosi.

Lau Afioga i le Fofoga Fetalai faapea sui usufono o le Palemene, avea ia au e fai ma sui o le Malo e momoli atu ai alofaaga ma faamanuiaga i lau Afioga i le Fofoga Fetalai, le mamalu o le Palemene, aemaise o tagatanuu uma o Samoa ina ia maua se Kerisimasi fiafia ma se Tausaga Fou manuia. Soifua.

FOFOGA FETALAI: Malo faafetai saunoa i lau Afioga i le Minisita o Tupe mo le Tala Ootoo aua le tuuina i luma o le Maota Fono.

E tusa ai ma le Tulafono Tumau 132, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.1) 2013/2014 e le itiiti ifo i le 14 aso, a o tuuina atu le Tala Faatatau o Tupe Faaopoopo (Nu.1) 2013/2014 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoa.

**TULAFONO TAU FAAOFI O AUAUNAGA LAGOLAGO
FAA-SOIFUA MALOLOINA 2013 – faitauga faalua**

FOFOGA FETALAI: Mo le silafia e le Palemene, o lenei Tulafono Tau Faaofi sa faia lona faitauga muamua i le aso 8 Oketopa 2013.

Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, ou te faatu le lafo, Ina ia faitauina nei le Tulafono Tau Faaofi o Auaunaga Lagolago Faa-Soifua Maloloina 2013 i lona faitauga faalua, ma ou te fia tautala faamalamalama i ai.

Faaluaina e le Minisita mo Punaoa Faanatura ma le Siosiomaga.

FOFOGA FETALAI: Tulai mai lau Afioga i le Minisita e saunoa faamalamalama.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

Afioga Hon TUITAMA TALALELEI TUITAMA: Lau Afioga i le Fofoga Fetalai, o lenei Tulafono Tau Faaofi o se Tulafono ua taumafai e faavaeina ai le Fono a Auaunaga Lagolago faa-Soifua Maloloina, ina ia aiaia ai le faamauina o tagata tomai faapitoa i auaunaga lagolago faa-Soifua Maloloina. Ua i ai le faamoemoe, o le faavaeina e lenei Fono o lenei auaunaga o le a mafai ai ona pulea aloaia le faatinoga o auaunaga lea o lo o faatino nei e nisi o taumafaiga i tulaga eseese ma o le a aofia ai i lalo. Ua leva foi ona alalaga le atunuu i tulaga tau auaunaga o lo o faatino nei e le au taulasea ma faatosaga faaleaganuu, tina i tua ma le anoanoai o isi auaunaga faapena e i ai fofoga, po o physiopherapist ma auaunaga uma lava faapena e le o aiaia nei i lalo o se Tulafono. O lea la ua taumafai le Tulafono Tau Faaofi lenei ina ia mafai ona aumaia i lalo o se tulaga e aloaia ai auaunaga ia ma ia mafai ai ona i ai se pulega talafeagai ma tataua ina ia limataitaiina ai le faatinoga o ia auaunaga ina ia tusa ai ma ala saogalemu o le soifua maloloina o le atunuu.

Lau Afioga i le Fofoga Fetalai, o se faamalamalamaga puupuu lea.

FOFOGA FETALAI: Malo faafetai i lau Afioga i le Minisita mo le faamalamalamaina o le tatou Tulafono Tau Faaofi. O lo o i ai le avanoa mo se sui usufono e fia saunao.

Tulai mai le sui usufono mamalu mo Faasaleleaga Nu.2.

Susuga PAPALII LIO FAAVAIVAIONANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai mo le avanoa. Faafetai foi i le Afioga i le Minisita mo lenei Tulafono Tau Faaofi ua tuuina mai i luma o le Laulau a Fono.

E momoli atu le agaga faafetai i lau Afioga i le Minisita e tusa ai o le maitau atu o lea ua avea lenei Tulafono Tau Faaofi e aloaia ai lenei Fono o Auaunaga Lagolago Faa-Soifua Maloloina po o le Council a nisi o matata e pei ona i ai le tatou falemai ma le tatou galuega o le soifua maloloina. E laitiiti lava nai fesili e fia malamalama ai foi lou sui usufono i le Tulafono Tau Faaofi.

E maitau i ai i le itulau o faamatalaga, e faamalulu atu i lau Afioga i le Fofoga Fetalai, e fia faavae ai se fesili, e maitau atu e pei e ono ituaiga auaunaga lagolago faa-Soifua Maloloina o lo o i ai i le itulau lea o faamatalaga. Ia, o lau fesili i lau Afioga i le Minisita, pe ua lava ni o tatou tagata i nei auaunaga uma e ono lea ua faamanino mai i le faamatalaga o lenei Tulafono Tau Faaofi?

Lona lua lau Afioga i le Fofoga Fetalai, o lo o i ai ni faamatalaga mo sui auai i lenei fono. A silasila i ai lau Afioga i le Minisita e tauala atu i le Nofoa, a silasila i ai i sui auai, na o le toalima. O le tuufesili lena a lou sui usufono, pe ua mafua aisea ona toalima aua o lea e sau i le Tulafono Tau Faaofi na o le toalima? Ia, ae toaono auaunaga lea ua aumai i totonu o le Tulafono Tau Faaofi.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

Afai e le o maua e lau Afioga i le Minisita, o lau vaai i ai, e le o i ai galuega tau soifua maloloina faaleaganuu lea na taua nei o taulasea faaleaganuu ma faatosaga faaleaganuu e le o i ai i totonu o sui nei e taua i totonu o le Tulafono Tau Faaofi lenei. Ia, ona fesili ai lea o lou sui usufono, pe aisea? O lea ua manaia le saunoaga a lau Afioga i le Minisita o lea ua faamamafa mai i totonu, e le o aafia i sui auai nei, na o le toalima lea e i totonu o le Tulafono Tau Faaofi. Pe i ai se mafuaaga ua ala ai ona le aafia latou ia i lenei fonolea ua taua nei o le a aloaia i lenei Tulafono Tau Faaofi?

Ae a silasila i totonu i agavaa o lo o i totonu o le Tulafono Tau Faaofi, o lo o manino ai lava, e ese le taua o le potomasani lea pei ona saunoa i ai lau Afioga. E pei o le uiga lena o le fesili a lou sui usufono, pe ua mafua i se a ona le aafia ai auaunaga ia faaleaganuu i totonu o le fonolea na o le toalima.

O le isi au fesili lau Afioga i le Minisita e tauala atu i le Nofoa, e i ai tagata tomai faapitoa i mea o tui Saina. Ia o lou sui usufono ou te le malamalama pe o a nei mea o tui Saina. E lelei le aumai o se faamalamalama i luma o le Maota, po o le mea lea ua omai Saina ma ni tui ia tatou, po o le a le uiga o le tui lea e aumai i totonu o le Tulafono Tau Faaofi lenei, ina ia manino ai foi lou sui usufono atoa ai foi ma le mamalu o le atunuu o lo o fia malamalama. Ma le agaga faaloalo. Faafetai i lau Afioga.

FOFOGA FETALAI: Malo faafetai. O le a faamalamalama e le Afioga i le Minisita le tui Saina lea ae le i... E i ai se isi sui usufono ae le i tulai mai le Minisita?

Ia, e manatu ua tapuvaetasi le... Malie lau Afioga i le Minisita mo le faasaoina o lou taimi se i tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai lava i lau Afioga mo le avanoa, faafetai foi i le Afioga i le Minisita mo lenei Tulafono Tau Faaofi. Muamua, e i ai nai vaega taua.....

FOFOGA FETALAI: Malie lau Afioga i le sui usufono o lo o saunoa se i tulai mai le faauilavea a le Afioga i le Palemia.

Susuga Hon Tuilaepa Fatiafofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e tele lava le malamalama o le mea lea pe a fai ma silasila sui usufono i le faa-Peretania o Schedules, lena e sau ai le faa-Peretania, ina ia faasaoina ai le tulai mai ma fesili ma toe fesili ma toe fesili. O le vaega foi e ono lena o lo o vaevae i vaega eseese, e pei o fofu o mea tiga o le tino, lea sa fesili ai le sui usufono lea faatoa faamaui atu nei lona tootoo. A tilotilo maeaea lava i tua i le schedules ona faasaoina ai lea o le tele o le mau fia lauga i fesili, ae o lena e matua manino lava le Tulafono Tau Faaofi.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

FOFOGA FETALAI: Ia, sei tulai mai le sui usufono mo Faleata Sisifo e faaauau le saunoaga i le Tulafono Tau Faaofi.

Ia, se i tuu atu muamua le avanoa i le sui usufono e a ia le mataupu. Tulai mai le sui usufono mo Faasaleleaga Nu.2.

Susuga Papalii Lio Faavaivaianu Taeu Masipau: Lau Afioga i le Fofoga Fetalai, a silasila i le vaega 4 o le Tulafono Tau Faaofi, o lo o manino o lena na o le toalima. O le ala lea o lau fesili, pe a silasila i le vaega 4. E ese le schedule lea e faamatala e le Afioga i le Palemia, ae o le vaega lea taitasi, na o le toalima sui auai.

FOFOGA FETALAI: Atonu o lea ua maua le saunoaga a le sui usufono. O le a tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaioi: A silasila i le faa-Peretania, o lena e matua manino ai lava le fofu. E lavea uma ai lava mea ia na ia taua, e oo foi i tui Saina, o lena foi e tau mai i le faa-Peretania, o mea o acupuncturist, o mea ua leva lava ona fai i Samoa nei, ae pei o le faa-Samoa lena e tau avatu. Ua ala ona ou vave tau atua, ona o lea ou te vaai atu ua tutu mai le toatele ae le o faitauina vaega na e manino ai e auiliili atu.

FOFOGA FETALAI: Malo faafetai. Ia, ou te manatu o le a faamalamalama auiliili e le Afioga i le Minisita mo le Soifua Maloloina.

Tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: O lea sa ou faitau i le Auaunaga Faa-Soifua Maloloina a le Atunuu, ae o lea tatou te talanoaina le Soifua Maloloina Lagolago a? Anyway, ua uma ona ou faitau i le Tulafono Tau Faaofi, ae o le a taatia ese le Tulafono lea.

Na pau la le mea lea e avatu ai se manatu lau Afioga i le mea lea ua taua i mea o taulasea, aua e faalogo pea tatou i aso uma ma aso uma i leitio, o taugologolo a latou fofu. Ua oo lava i mea ou te talitonu e le oo i ai le fofu, ia o fatugao ma cancer ma mea uma, ua faapea e o atu i ai. E lelei, aua o le filifiliga saoloto lava a le tagata ia e fia alu i ai, a o le mea lea e popole i ai, o lea e pei a tagofia e le Tulafono Tau Faaofi o le a faa-laisene tagata nei.

I lou lava vaivaiga, ou te talitonu o lea lava e talafeagai i le taimi nei le auaunaga a le Vaega lea, e le o i ai se avanoa e ono aiaina ai faaletulafono. Aua o le taimi lava e resitala ai e le falemai ma ave i ai le tusipasi lea po o le certificate e faatino ai lana auaunaga, o i ina i lou talitonuga o le a i ai se avanoa e aafia ai fua le Matagaluega i le Tulafono. Ae lelei lava le faatinoina pea o le tulaga o lo o i ai le auaunaga faa-soifua maloloina i lenei taimi, ae taatia pea nai a tatou taulasea ma fofu Samoa na tatou ola mai o i ai.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

Ia fai pea le latou foi auaunaga aua o le filifiliga saoloto lea a le tagata, e aunoa ma le tatou tau aapa atu pea e ave i ai ni tusi foi nei faamaonia e faatino ai le latou auaunaga. O le popolega lea i lou nei sui usufono, aua o lea lava i aso uma aso uma aso uma e vaavaai pea i ai, ia, o nisi foi o tatou e foi mai loa i le falemai e le mafai ona maua se mapusaga i le falemai, o loa i si vaega lea, e fia maua i ai se fesoasoani, i lo latou lava lea faitalia. Ae afai nei e o atu e saili togafiti ae le manuia, a o lea ua i ai lona tusi faamaonia lea mai le Matagaluega ina ia mafai ai ona faatino auaunaga lea, ona toe tulai mai ai lea o se feteenaiga mulimuli ane, e ono aafia ai fua le Malo ma le Matagaluega ae manaia lava le taatia pea o galuega a nai taulasea e faatino lava i le latou aiatatau ma le aiatatau foi a le tagata ia e alu e asiasi i ai, i lona talitonuga e manuia ai i lea vaega.

E pei o le tulaga lea. Ae o le isi tulaga i le tatou falemai, e avatu lava le faafetai i le Afioga i le Minisita ma le Malo i le tatou falemai fou. E tasi lava le mea lea e i ai, o le eletise, lea sa laga e le Matagaluega talu ai, ua fai si taugata o le eletise, ona o lea e pei e tofogi atu e le Vaega lea i le.....

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea o le a tauau ina agai atu fua i le eletise. Tatou agai mai pea i le Tulafono Tau Faaofi. O le mea lena e toso ai tatou mataupu o le agai i mea o fofu nei traditional healers a o lea o le a tosotoso mai fua ma le eletise. E le o i ai ni eletise i totonu o tatou Tulafono Tau Faaofi, agai mai pea. O le mea foi lea i le tulaga o le au fofu, e toatele lava mai e avatu i uta, e le mafai ona togafitia ai, ae aumai i le matou keni lea ou te faa-tama ai, e matua selau pasene le latou fesoasoani. E leaga e i ai lava mai, o mea nei o fofu mai fafo, faatoa omai mai fafo. A o fofu nei sa masani ai tatou i le 3,000 tausaga, o lea e mafua ai ona tatou feola. E i ai lava gasegase e aloaia ai a tatou fofu. E i ai tagata ua matua aafia lava fofoga e le mafai, e avatu i le falemai e le mafai ona fofu ai, ae aumai ula i le fofu Samoa ona cure ai lea.

Lau Afioga i le Fofoga Fetalai, e eseese lava mea. O le upu sili ona taua lea sa saunoa i ai le Minisita, o le aloaia. A leai nei se Tulafono, ona o lea e pei lava o le fomai foi lele e ulagia e le o i ai tagata ma le aloaia. O le upu taua, o le aloaia.

FOFOGA FETALAI: Malo. Ia, e manatu ua malamalama. Malie le sui usufono na ou tuu atu le avanoa i le falemai ona o lau faafetai i le Minisita, ae o lea o le a agai i le eletise, ia agai i le tatou Tulafono Tau Faaofi lau Afioga.

Tofa LEALAIPEPULE RIMONI AIAFI: Lau Afioga ma le faaaloalo lava, lelei.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

E matua manaomia lava le fuesaina e mili ai tatou i le aso lenei e maua ai le malosi, aua o le fofu taua lea. E le o i ai se manatu foi lea i lau faamatalaga e faatauagavale, oi, e taua tele le auaunaga lea a nai ia foi vaega o si o tatou atunuu o lo o taumafaia le mea lea pei ona faatama ai le Afioga i le Palemia. A o le popolega, o lea lava tatou te aloaia. O le popolega o le faaletulafono ma aumai foi lea e ave i ai le certificate pe aloaia ai lana auaunaga. E pei la o le mea lena o lea e popole i ai sui usufono. Ae le gata la i lea, o le tau. Pe i ai se tau aua o lea e faapea e i ai le tau e resitala ai, pe resitala fua, ae aua la le totogia, aua e fai foi ma mea e ono alofia ai e o tatou tagata le o fua e resitala i nei mea.

Lau Afioga, o nai manatu na, ia manuia le tatou Fono.

FOFOGA FETALAI: Malo. O lea ua maua le finagalo o le sui usufono. Ua maea sui usufono na saunooa, tulai mai lau Afioga i le Minisita e tali atu i fesili ma faamalamalamaga a sui usufono mamalu.

Afioga Hon TUITAMA TALALELEI TUITAMA: Malo faafetai i lau Afioga i le Taitaifono ma le faafoeina o le tatou Fonotaga. E tusa ai ma le atugaluga o le sui usufono mo Faasaleleaga Nu.2, po o lava tagata. Ia, o le mea moni lava ua ou iloa a faitau taulasea ia e i totonu o Samoa, masalo ua ova ma se 2,000 pe a.

O faatosaga e faapena foi, ae atonu o lea e silasila i isi vaega ia e le i oo mai iinei ia tatou, ae le avea lena ma tulaga tatou te nofoai ai, aua o lea tatou te iloa o lo o asiase mai latou nei mai fafo ma faatino auaunaga ia i totonu o Samoa. E tatau foi la ona i ai se vaega o se Tulafono e aiaia ai ma puipui ai a latou galuega faatino i totonu iinei, e tai pei la o mea nei o acupuncturists, lea e tau o tui Saina. Ia, o lea e faatino lava e i latou mai Saina, ae i ai le taimi – o le vaitaimi nei, masalo ua oo i le 10 ma ona tupu a tatou tamaiti o la e ua faasikolasipi i Saina e aoaoina faa-fomai. E i ai la nisi oi latou nei i se taimi o i luma e toe talii mai ma se tomai fou faapea e faaaogaina ai tui Saina nei, e faaauauina ai le auaunaga lenei ia i tatou i totonu o Samoa nei, a o lea la ua i ai le Tulafono e mafai ai ona aloaia foi lena auaunaga pe afai e faatino e o tatou tagata. A o le taimi nei, o lea lava e faatino i lalo o le Tulafono foi lea o le Soifua Maloloina. O le ala foi lea o lea e galulue ai i uta i le Soifua Maloloina. A o le auaunaga lagolago e pei la o le physiopherapist. Ia ua leva ona i ai a tatou fofu ia o lo o faatino i uta, ma le anoanoai i lalo o le schedule lena e lisi atu ai auaunaga ia ua leva ona i ai auaunaga faapea ae le o malupuipua pe malu taitaiina i lalo o se Tulafono. E pei la o le taumafaiga lena o lea ua liliu atu i ai le tatou Malo ina ia amanaia foi lenei auaunaga i lalo o se tulaga pulea ma se tulaga saogalemu mo le togafitia o tatou tagata.

O le tui Saina la lena. O lea ua uma ona saunooa atu le Afioga i le Palemia i le tulaga o Council Members. Silasila foi mo se faataitaiga, a tilotilo i lalo o le Applied Health Science Services; o le bio-medical engineers, bio-medical technicians, audiologists, ma pharmacologists.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

O le d, e, f, g, e leai se isi o i ai i le taimi nei, a o lea o lo o aoga i latou e faatinoa auaunaga nei i se taimi o lumanai. E le mafai la ona tofia mai se sui mai se faalapopotoga e le o i ai ni tagata ua qualify po ua faauuina e faatinoina auaunaga nei o lea e faatino e o tatou tagata auauna fesoasoani mai fafo.

E tusa ai la ma le faafesili a le Afioga i le sui usufono mo Faleata Sisifo, o lea e faapea, po o le faa-laisene o i latou nei. O le ala tonu lava lea o le Tulafono Tau Faaofi lea, ina ia taumafai e pulea i lalo o se Tulafono galuega a ia foi auaunaga ua lava lo latou sao i totonu o Samoa, ina ia i ai se tulaga amanaia e fesoasoani ai, ae ia pulea ai foi a latou galuega fai. O i latou ia e tumutumu ai nei potu o fomai tumaoti ma o tatou falemai, o le anoano o tagata ia o lo tatou atunuu sa gasegase na agai i taulasea e fofo ai. Ona oo lea ina toe foi i galuega fai atu le pule o le fale fai galuega, “Ia aumai la sau pepa mai.” E le o aloaia la e fale faigaluega ni pepa mai mai taulasea, na o pepa mai mai fomai o lea ua uma ona laisene. O le ala lea o lea ua i ai se faamoemoe afai e oo i se tulaga aua o le vaega lea o le auaunaga lea a taulasea e matua aloaia lelei, e fai tusipasi ma aoga faalelei i tulaga faapea.

Atonu e i ai foi se taimi e fai ai se tatou aoga Taulasea ma fai ni a latou graduation e graduate ai i latou ua iloga le tomai i mataupu tau taulasea, ae ave i ai ni o latou tusipasi po o ni o latou degree latou te faatinoina ai le auaunaga lea, ona amanaia lea i lalo o le Tulafono.

Tofa Lealailepule Rimoni Aiafi: Lau Afioga i le Fofoga Fetalai....

FOFOGA FETALAI: O lea o le a maea.....malie le sui usufono mamalu se i faamalamalama pea e le Afioga i le Minisita ona toe tuu atu lea o le avanoa.

O le a se mea lena e te fia saunoa i ai? *(I le sui usufono mo Faleata Sisifo o lo o tulai).*

Tofa Lealailepule Rimoni Aiafi: O le mea tonu lava lea o lea na avatu ai atugaluga o le sui usufono. O lea ua outou faafofoga i le saunoaga a le Afioga i le Minisita, e le gata ina pulea a o le a faaaoga. O ituaiga mea eseese ia o le a sauni i ai le Pulega e fai. O le tulaga lena o lea na avatu ai le popolega ona e leai e le tau aoaoina tagata ia aua o le malamalama e pasi mai i lalo i totonu o aiga ma tulaga faapena, a o lea o le a toe faaaoga. E le iloa foi po o ai na te mafaia ona toe avea ni tusipasi i tagata nei. E le mafai e le Afioga i le Minisita ona ia faia se mea faapea o le ave o ni tusipasi aua e leai sona malamalamaga i ai. Ona pau lava le mea e iloa e ia o le fai o le tui o le mai, a o galuega a taulasea e le malamalama i ai le Minisita.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

FOFOGA FETALAI: Malie le sui usufono, o le fomai lava o le fomai. Pe papalagi pe fomai Samoa, doctor is the doctor. E malamalama lelei mea tau soifua maloloina.

Tofa Lealailepule Rimoni Aiafi: Lau Afioga i le Fofoga Fetalai, na o le Afioga i le Palemia na te aveina tusipasi i taulasea aua o ia lea e faatama ma aoga ai taulasea, a o le Minisita na o le...le mea le la e fai.

FOFOGA FETALAI: Tulai mai le Minisita, agai pea i le faaiuina o lau saunoaga ae aua e te apoina le saunoaga a le sui usufono mamalu.

Afioga Hon TUITAMA TALALELEI TUITAMA: E leai, o lea e tau faalauiloa atu foi i lo tatou Maota. Ailoga o silafia, o le Afioga i le Palemia o le isi taulasea numera tasi lea o lea e i ai nei. O lea foi ua tataua ona ave sona tusipasi aua ua matua pasi atoatoa.

O le tulaga lea e manumanu i ai le tilotilo a le Matagaluega, aua e pei o tulaga nei aua o lea foi sa sau i saunoaga. Ua aumai faaaliga sese e taitaiseseina ai le atunuu ona ua faapea mai, ua o isi taulasea talai i tua ma faapea, “O au ou te fofu i le suka ma le toto mauuluga.” A o tulaga faapea e le saogalemu mo nai o tatou tagata, aua e taitaiseseina ai i latou e suka ma toto mauuluga ona e le o i ai ni faamaoniga. Peitai, a i lalo o le Tulafono lenei e mafai ona limataitaiina ai ina ia agai tonu i le vaega o lo o faapitua i ai le latou auaunaga, ae aua ne i aafia fua auaunaga latou te talitonu e le mafai ona latou togafitia aua e le saogalemu mo le lautele o le atunuu.

O vaega la ia o lea e taua ai tele le Tulafono Tau Faaofi lenei. Lau Afioga i le Fofoga Fetalai, o nai faamalamalamaga ia e tusa ai ma le le malamalama o i latou o lo o faaogaina nei auaunaga, a o lea e talitonu i ai.

**Tofa TOLELESULUSULU CEDRIC POSE SALESA SCHUSTER
(Aana Alofi Nu.3):** Lau Afioga i le Fofoga Fetalai.....

FOFOGA FEETALAI: Ia, le sui usufono mamalu mo Aana Alofi Nu.3.

Tofa TOELESULUSULU CEDRIC POSE SALESA SCHUSTER: Faafetai lava i lau Afioga i le Fofoga Fetalai mo le avanoa. E faamalie atu foi i lau Afioga i le Minisita, o lea sa tau maitau le tulaga lea.

Lau Afioga i le Fofoga Fetalai, atonu e leai se agaga tele i le Tulafono Tau Faaofi.....

FOFOGA FETALAI: Malie le sui usufono mamalu mo Aana Alofi Nu.3, o lea ua tali le Minisita. Ou te manatu ua tautua-upega, a o lea e maua lou avanoa i le iloiloga auiliili ona manino ai lea o le mataupu lea e te fia malamalama i ai. Tulai mai le sui usufono mo Siumu.

17 TESEMA 2013

**Tulafono Tau Faaofi o Auaunaga Lagolago Faa-Soifua
Maloloina 2013 – faitauga faalua**

Tofa Hon Tuuu Anasii Leota (Siumu): O le mea e fia faamalamalama lau Afioga i le Fofoga Fetalai. E fia fesili atu i lau Afioga i le Minisita, po o le a le gasegase e taulasea ai le Afioga i le Palemia?

Ma lou faaaloalo lava.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E tatau lava ona ou tali atu leaga o au ou te taulasea. A faapea o gasegase le sui usufono, ona alu atu lea nanei i lou ofisa se i ou tagofia oe.

O le mea lea o le fofo i lima i mea tiga o le tino, e ala ona tiga ona o le toto ua le fetafeai. E faapena la, aua e eseese pe a e lolomia le tagata. E te tagotago foi lele i ai e faamaveve le gao ua mafiafia, ae a oo atu loa i le vaega ua matua mafiafia ai le gao, ia matua tuma loa. O le mea lea e tele ai ina afaina isi tagata ona e lei lava le aoaoina. Aua e oo foi i fofo, e i ai foi le aoaoga e tatau ona fai. E aoao e le tina le fanau e faapea ona fai le fofo. E sao lelei lava le faamalamalamaga a le Afioga i le Minisita. O lea foi la e avatu i le Tulafono lea e i ai le Regulation po o le Tulafono Faatonutonu e faavae ai aiaiga ma tuutuuga e tuuina atu ai certificates po o laisene ma tusipasi ina ia faasaoina o tatou tagata.

Ia manatua, e le gata ina aloaia le au fofo ae ia puipui foi o tatou tagata mai le vaega foi lele lea e tau faasese. E i ai le isi fofo na ou alu atu i ai ua tiga lou tua, ae sau le tala, “Ua faafaiavaina oe; o lou toalua lea e taoto mai i fafo ua le malie ona o lea ua toe fai le isi ou toalua.” E aoga tele la i le sui usufono mo Siumu le mea lea ou te fai atu ai. O le itu lena e puipui i ai aua e te alu atu o lea e lavea oe i le gasegase ua le fetafeai le toto, ae faapea mai le fofo, “Sa e piopio anapo, o le faafaiavaina lea ua e lavea ai?”

O le tulaga lena lau Afioga i le Fofoga Fetalai ona ua fesili mai, a o au le isi taulasea aua o le mea lea e ala ai ona omai loomatutua faatama au ona ou te malamalama lelei i la latou amio la e fai.

Lau Afioga i le Fofoga Fetalai, o le faamatalaga lea.

FOFOGA FETALAI: Faafetai i lau Afioga i le Palemia.

Tofa Hon Tuuu Anasii Leota: Lau Afioga i le Fofoga Fetalai.....

FOFOGA FETALAI: Se i tulai mai le sui usufono mamalu.

Tofa Hon Tuuu Anasii Leota: O le toatele ia o sui usufono o lo o mamai i le gasegase lea e saunoa i ai le Afioga i le Palemia. Ua leva foi ona ou taamilo e saili se fomai a o lea faatoa maua. O le a ta feiloai nanei lau Afioga i le Palemia.

Na faamaonia le lafo ma faitauina le Tulafono Tau Faaofi o Auaunaga Lagolago Faa-Soifua Maloloina 2013 i lona faitauga faalua.

17 TESEMA 2013

Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 – faitauga faalua

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai mo le iloiloina ma toe lipoti mai i le Fono Aoa o se fonotaga o lumanai.

**TULAFONO TAU FAAOFI O LE FAALAPOTOPOTOGA FAAVAE E UUNAIA LE SOIFUA MALOLOINA LAUTELE 2013
– faitauga faalua**

FOFOGA FETALAI: Mo le silafia e le Palemene o le Tulafono Tau Faaofi leni sa faia lona faitauga muamua i le aso 8/10/2013.

Tulai mai le Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva ma le Minisita mo Punaoa Faanatura ma le Siosiomaga.

FOFOGA FETALAI: Tulai mai lau Afioga i le Minisita e saunoe e faamalamalama le Tulafono Tau Faaofi.

Afioga Hon TUITAMA TALALELEI TUITAMA: Lau Afioga i le Fofoga Fetalai, o le faavae o le Faalapotopotoga Faavae e uunaia le soifua maloloina lautele o Samoa, o le tasi lea suiga tele i totonu o suiga o le Malo o Samoa i totonu o le vaega o le Soifua Maloloina ua vavae ese ai le faaooina atu o auaunaga faa-soifua maloloina mai le faatonutonuina faaetulafono ma le mataituina o nei auaunaga.

I luga o le faavaeina o le Faalapotopotoga faavae, o le a muamua tulaui galuega tauave a le Matagaluega o le Soifua Maloloina i luga o ana matafaii faatonutonu faaetulafono ma matafaii mo le mataituina i totonu o le vaega a le Soifua Maloloina a o tulaui le vaai a le Faalapotopotoga Faavae i le uunaia o le soifua maloloina ma le faaooina atu ma le faatinoina o gaioiga e uunaia ai le soifua maloloina o tagata o Samoa.

O le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013, ua faavae ai le Faalapotopotoga faavae e uunaia le soifua maloloina lautele ma ua uunaia ai mo sini, galuega tauave ma malosiaga a le Faalapotopotoga faavae.

O taiala faataaitia alualu mamao a le Faalapotopotoga Faavae, o le a pulea ma faafoe e se Komiti Faatino.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O Faatonu e aofia ai sui auai e toafitu o faatinoga i aso taitasi a le Faalapotopotoga Faavae o le a tauaveina e le Ofisa Sili o Pulega ma le aufaigaluega a le Faalapotopotoga Faavae o le a tofia e tusa ai ma le Tulafono.

O le a amata le faatupeina o le Faalapotopotoga Faavae mai tupe faameaalofa a le Malo o Samoa, o tupe faameaalofa mai isi Faalapotopotoga i totonu o le atunuu ma tulaga faava o Malo, o foai tau tupe, o tupe e tuu atu e ala i se mavaega ma isi lava vaega e maua ai e le Faalapotopotoga Faavae.

Ua faavaeina foi i le Tulafono Tau Faaofi se faaputugatupe e uunaia le soifua maloloina lautele lea o le a tofogiina i ai tupe uma e maua e le Faalapotopotoga Faavae ma tofogi atu ai tupe mo gaioiga a le - Faalapotopotoga Faavae.

Ua fuafuaina foi e faapea, o le a iloiloaina ala o le faatupeina o le Faalapotopotoga Faavae i totonu o le lima tausaga talu ona faamamaluina le Tulafono ua faavaeina ai le Faalapotopotoga Faavae.

O le faapupulaga puupuu lea o le Tulafono Tau Faaofi lau Afioga i le Fofoga Fetalai ma le faaloalo lava.

FOFOGA FETALAI: E manatu o lea ua avanoa le tatou Tulafono Tau Faaofi mo se tasi e fia saunoa.

Tulai mai le sui usufono mamalu.

Tofa LEVAOPOLO TALATONU: E faafetai atu i lau Afioga i le Fofoga Fetalai, e faafetai atu foi i le Afioga i le Minisita mo lana folasaga malamalama e tusa ai ma lenei Tulafono Tau Faaofi.

O se manatu puupuu lau Afioga i le Fofoga Fetalai. Ua matauina e lou sui usufono le anoanoai o Tulafono Tau Faaofi aemaise o Teuteuga. O lea foi la ua faatulai mai lea vaega fou, ae tasi lava le auga o le faamoemoe, o le uunaia lea o le soifua maloloina o le mamalu lautele o le atunuu. Ia te au la ma lau maitau, afai ua tele nisi tulafono ma isi faiga faavae sa faataoto ai le manulauti lea, lea ua i ai ma le mea fou lea, ona ou manatu lea o lo o i ai se faaletonu tele, aua o le upu moni lava lau Afioga i le Fofoga Fetalai, o results lava o auaunaga ia, aemaise le latou performance po o le faatinoga o auaunaga.

O le a fai sau tala faataitai lau Afioga i le Fofoga Fetalai i le tulaga o tatou ripoti ia i le tatou Falemai Faamama Toto. O lea ua oo i le tulaga ua tolu status o gasegase i le tatou falemai lea. O le vaega muamua, o la e i ai le magalo. O lona lua, o la ua oo i ai le vaega foi lea ua mai. O lona tolu, o lea ua i ai le faafitauli tele lava o le taufao o le magalo ma le mai. O le uiga la o sau faamatalaga lau Afioga i le Fofoga Fetalai, a tilotilo lelei i lipoti ia ua i ai mai le taimi lenei mai le falemai faamamatoto, masalo ua matua siitia lava i luga le aofaiga o gasegase ua oo i ai le faafitauli lea masalo po o ua latalata i le 80.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O le isi vaega lea e i tua mai ua ova ma le 100 ua lata i le 200 gasegase ua amata ona oo i le tulaga ua tau aafia tele le latou soifua maloloina. O lea foi la ua molimauiina i le aso i le Tala Faatatau o le Tupe pei ona fofogaina e le Minisita o Tupe, lea foi ua toe faaopoopo le isi \$1miliona i le mea lava lea e tasi. O lona uiga lau Afioga i le Fofoga Fetalai, e tele lava le faaletonu o lo o tulai mai i auunaga nei, ae afai lau Afioga i le Minisita o se Faalapotopotoga po o se faiga fou lea e maua ai se tulaga lelei ma faasoina ai tupe a lo tatou Malo, ia o lau tala ia manuia ou faiva. Ae o lau fautuaga lau Afioga, toe timata le upega i le tulaga o le auunaga – ma ou te fai atu lava lau Afioga i le Fofoga Fetalai i lou maitauina mai o Tala o Tupe i tausaga ua mavae, e laiti atu tupe faaalua i le tulaga o le auunaga po o le taumafai e fai le tatou prevention i lo tupe ia ua aumai manino nei o lo o faaalua i treatments o gasegase ia aemaise gasegase e avatu mo togafitiga i Niu Sila, e pei o le tasi lena vaega.

O lau fautuaga i le tulaga lea pei sa avatu muamua foi se fautuaga vaivai a lenei itumalo, o lea ua manino mai foi e tele vaegatupe faameaalofa mai mo polokalame ia a lo tatou atunuu. O lou fiafia ia i polokalame ia e faatino nei e fomai lea e sponsor e le digicel, ae afai na o se fautuaga e tuuina atu i tafatafa o lau Afioga a aoga lelei, tuu se vaegatupe mo a tatou falemai tumaoti, e tele a tatou fomai o lo o lava lo latou taimi ia ona faasolo ai lea o se tatou polokalame foi lea mo itumalo uma, ia regular le check o medical a tagata uma lava o le atunuu lenei, tasi lena fofo.

E pei na o ni nai vaega na e fesoasoani atu ai ma tuu atu se fautuaga, ae pule lava lau Afioga i le Minisita, faafetai mo le avanoa.

FOFOGA FETALAI: Malo faafetai saunoa. O le a avatu le avanoa muamua i le sui usufono mo Faleata Sasae, ona tuu atu lea o le avanoa i le sui usufono mo Faasaleleaga Nu. 2.

Tulai mai le sui usufono mamalu mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, e muamua foi ona momoli le faafetai i le Afioga i le Minisita aemaise o le Matagaluega mo le faatinoina o lenei Tulafono Tau Faaofi taua.

E i ai lava lou popolega i le Tulafono Tau Faaofi lenei lau Afioga i le Fofoga Fetalai. O le vaega muamua e pei ona silafia e le mamalu o le atunuu, toetiiti lava leai se vaega o le Health e le o faatinoina le vaega lea o le promote ina lea o awareness e uiga i le olaga soifua maloloina o tagata taitoatasi. E pei ona silafia, o lo o i ai le polokalame o lo o faatinoina e le vaega lea o le mai suka, o lo o i ai le polokalame e faatinoina e le vaega lea e maua i le aids, o lo o i ai le polokalame e faatinoina i le vaega lea o le cancer. O vaega uma lava ia o le health, o lo o tofu lava ma le polokalame e faatino ai le faalauiloa i tagata aua le soifua maloloina o tagata taitoatasi.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O lea la ou te fesiligia ai le Afioga i le Minisita, po o le Tulafono la lenei o le a aumai uma ai lava le promote ina o le health lea i lalo o le Tulafono lenei ina ia tasi ai se vaega e uunai atu ai le faatinoina o lea matafaioi? Aua pei ona saunoa se tasi o sui usufono, tasi lenei o vaega e tele se seleni a le atunuu o lo o alu ai, ae o se vaega taua foi, ona e tatau, e le mafai ona ola manuia se atunuu pe afai e le soifua maloloina ona tagata, ae a tagai la i le vaega pei ona i ai nei.

O le faaitaiga; a tagai nei tatou i le Televisi i le faasau o mea e le tatau ona aai pe taumamafa ai a tatou fanau ma tagata, mea e ono aafia ai le soifua maloloina, a? O ai la e patino i ai le galuega lea? O ai e mafai ona latou taofia nisi o vaega ia pei ona saunoa le Afioga i le Minisita i se tasi foi o Fonotaga ua tuanai? O le suka o se faamai oti lea ua i ai nei. Ae a outou tagatagai i le faasau i le Televisi o mea o faguinu, beer o mea uma faapea e faataugofie mea uma faapenei, ua mafai ai ona maua le avanoa i so o se isi o le atunuu o le taugofie o le faaaogaina, ona maua ai lea i le mai lea e ala ai ona tatou taumafai e faatino lenei Tulafono. O lea la ou te fesili atu ai i le Afioga i le Minisita, po o le Tulafono la lenei o le a aumai uma lava i ai vaega ia taitasi e faaalu i lalo o le Tulafono lea?

E ala ona ou fesili, ona i lau vaai atu i le faatinoina o lenei Tulafono pei na o le fa lava sini autu o lo o i ai i le Tulafono lenei. A tagai foi i ai i le faatinoina o le Tulafono lenei, e pei e autu lava i le CEO i le tagata foi lea le Pule Sili, pei o le tele o le galuega lenei e tasi lava le tagata na te faia. Ona sau ai lea i lalo i le isi vaega o le Tulafono, e filifili e le Board po o ai tagata e faatinoina. Ae sa i ai lou talitonuga ma lou manatu, sa tatau ona aumai i le Tulafono lenei po o le a se administration staff, o le a se administration structure o le a faataatia ai lenei vaega, leaga e le o se vaega laitiiti le Tulafono lenei pe a oo ina faatino, pe afai o i lea o le a alu uma i ai le faatinoina o le galuega lenei o le taumafai lea ina ia maua le soifua maloloina i totonu o le tatou atunuu. O lea la ou te fesili atu ai i le Afioga i le Minisita ma lou faaaloalo lava.

FOFOGA FETALAI: Malo faafetai saunoa. Tulai mai se tasi o sui usufono mo Faasaleleaga Nu. 2.

Susuga PAPALII LIO FAAVAIVAIONA TAEU MASIPAU: Faafetai i lau Afioga i le Fofoga Fetalai mo le avanoa, e fia avatu foi se sao i lenei Tulafono Tau Faaofi taua, aua foi o lea ua tuuina mai, atonu o le aso lava lenei o le aso o le Minisita mo le Soifua Maloloina, e taua foi le tele o Tulafono ua tuuina mai i le Maota.

O lea ua maua foi e lou sui usufono, pei o se pulega fou foi lenei Tulafono Tau Faaofi ua tuuina mai e faaopoopo i le tatou pulega o lo o i ai i le taimi lenei i le Ofisa Sili o Pulega o lo o i ai le puipuga o le tatou soifua maloloina lautele, le Health Protection lea e faatulafonoina aua le puipua o faamai, e faapea foi le Health Care o lo o i ai i le taimi nei o lo o i ai a tatou falemai e faapitoa i togafitiga.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

A o lea ua maitau atu o lea ua maua foi i a tatou faatalatalanoaga sa fai, e pei o le auga o le Tulafono pei e lona tolu i ai o le promotion o le health promotion po o le faalauiloa. I le vaavaai lava i ai ma le totoa i sini autu foi ma galuega faatino i lenei Tulafono Tau Faaofi, e maitauina pei ona saunoa nisi o sui usufono, pei e lilifa lava i galuega faalauiloa i le maitau i ai i lenei Tulafono Tau Faaofi, ina ia faamausali ai pea le talitonuga foi lea faasoifua maloloina, ‘e sili le puipuia i lo le togafitia,’ i lau lena maitau i le aano moni o lenei Tulafono ua tuuina mai. Ae a silasila i le tulaga o i ai nei le Ofisa Sili o lo o i ai nei, o le puipuiga o le Health Protection, ia ona tuufesili lea o lou mafaufau po o le a le mea ua eseese ai le promotion ma le protection, a o galuega faalauiloa lava mo le puipuiga o faamai. E oo foi i galuega a Health Care latou o lo o i ai nei, ia o lo o i ai foi puipuiga o faamai o lo o i ai. A o le agaga lava o lou sui usufono, e leai o a tatou tupe faaalu pei o le agaga lava lena o lou sui usufono ona o le a faaopoopo foi nisi a tatou tupe faaalu i lenei foi Pulega fou o le a tulai mai, ae manaia le agaga o le Tulafono. A o le agaga lena o lo o avatu faafautuaga faapena, ona o lea e le o manino mai pe toafia se aufaigaluega o le a galulue ai, vagana le Komiti Faatino lea ua maua e toafitu, ia e i ai foi ma le Komiti Faufautua, ia tasi ia Komiti o le a faaopoopo i ai nisi foi seleni, aua o lo o manino mai i le Tulafono, e mafai ona tasi, e mafai foi ona tele atu. O lona uiga e oo foi i le sefulu ma ona tupu po o se luasefulu, ioe. Ia pei o itu na o lea e vaavaai i ai ona o a tatou tupe alu i le agai i luma.

Ae i lau lava maitau i lenei taimi, pei o faamai ogaoga lava lea e pei ona i ai le tatou atunuu i lenei vaitaimi e peiseai o le mai suka lava ma le toto maualuga, sei vaeatu le paia o le Maota ma le faafofoga mai o le atunuu, ou te talitonu foi o faalauiloa lea ua i ai i le taimi lenei, ua matua manaia lava i lau vaavaai, o le matua manaia lava, ou te iloa foi e le toe i ai se tupe tele e toe alu ai i nei faalauiloa ua i ai i lenei taimi, ua amata foi ona masani lo tatou atunuu i galuega faalauiloa, aemaise lava faamai tetele ia e lua mo le tatou atunuu i le matou lena vaai i ai, o lo o sologa lelei lava a tatou galuega o lo o faalauiloa.

Na o se fautuaga lava e tuu atu i le Afioga i le Minisita, e mafai foi ona tasi le Ofisa Sili o Pulega ae fai se vaega faapitoa mo lea vaega fai se division, ae o la e tasi le alaga-tupe e alu i ai. Aua a fai foi se Ofisa Sili fou, o lona uiga, ia ua ese foi lona ia totogi ua tutusa ma le Ofisa Sili o le Pulega o lo o i ai nei, ave i ai ma lana taavale ia toe utu ma lana taavale, fai ma ana Pule Sili Lagolago faaopoopo, ia o nai mea na o lea e avatu ai se fautuaga, o le mafaufau lava i a tatou tupe faaalu.

O lona lua o se taofi, o le tatou Komiti Faatonu, e leai e le o se isi itu, a o lea e maitau atu, o le Afioga i le Palemia e Taitaifono. Ona fesili ai lea o lou sui usufono, ia po o le a le mea o le a Taitaifono ai le Afioga i le Palemia o lo o i ai lau Afioga i le Minisita. Pei o itu na o lea e vaai i ai lou sui a usufono, po o i ai se mafuaaga po o ua le faatuatuaina lau Afioga i le Minisita e le Afioga i le Palemia.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O tulaga faapena o uiga na o lea matou te manatu ai, ae a silasila i ai i taunuuga o lipoti a nei Komiti, e fai fai lava fono a Komiti nei, ae lipoti lava i le Minisita, o le mea sili lena na ona Taitaifono o le Palemia ae lipoti i lau Afioga i le Minisita. Pei o mea na o lea e tau tilotilo faapena i ai, pei e tau le fetai ai ia mea faapea i le vaavaai ma le tilotilo.

E i ai la nai mea malie ia i le Tulafono e aoga foi vaeatu lau Afioga i le Fofoga Fetalai semamanu o lea e lei oo i Komiti, e i ai foi nai mea malie o le Tulafono o lo o i ai, o la e i ai le malosiaga o le Taitaifono e mafai ai ona aveese le tofi, e i ai le tagata taua lena e i ai qualified member i totonu o le Komiti Faatino lea, e i ai le malosiaga o le Taitaifono e mafai ona aveese ai mai le fautuaga a le Kapeneta. Pei o itu na o lea e maitau atu, ia o le Palemia o le Taitaifono o le Komiti, o lau Afioga o le Sui Taitaifono, ae o le Kapeneta foi e i ai le fautuaga o le mea lea. Ia na ona silasila ifo i ai o lau Afioga pe talafeagai lena tulaga.

Lona lua, o le tofiaina o le aufaigaluega i le maitau i le Tulafono lenei, ua le gata ina tofia e le Komiti Faatonu le Ofisa Sili o le Pulega lea, ia toe tofi ma le aufaigaluega. E avatu pea i autafa o lau Afioga pe talafeagai ia mea ona o faaupuga o le Tulafono lea e sau ai.

O lona tolu i le maitau i ai, a silasila i ai a fai faaiuga a le Komiti Faatino lenei, e sau faaupuga faapea e mafai ona fai le faaiuga i le majority i le toatele, ae sau ai ma le isi faaupuga a silasila i ai lau Afioga, ae sau ai ma le upu lena faa-Samoa, ae peitai, faa-Peretania, but, o le a tatau ona i ai i le Taitaifono se palota e fai ai le filifiliga ma se palota e fai ai se faaiuga. Ia na ona tuu atu i luma iina o lau Afioga e silasila i ai i le tulaga lena, e aoga foi lo matou faufautua meamanu lea e lei oo i le tulaga o le tatou....

A o lau fesili mulimuli i lau Afioga i le Minisita ia o lau Afioga foi o le alii fomai, e mafai e le mea lenei o le faamalositino ona aveese le mea foi lea o le mental stress a? O lau fesili lau Afioga, pe mafai e le tatou faamalositino ona aveese le popole o lo ta mafaufau i le taugata o le soifuuga lea e i ai nei? Ia o lau fesili lea ma le agaga faaaloalo, faafetai i lau Afioga i le Fofoga Fetalai mo le avanoa.

FOFOGA FETALAI: Malo. E tuu atu pea le avanoa i sui usufono mamalu ona o le taua o le tatou Tulafono i lenei taeao. Tulai mai le Sui Taitai o le Itu Agai.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai faafetai tele mo le avanoa. E tulaia le pau o le Fonotaga i lenei taeao ma le faaaloalo, e puupuu lava se manatu ona o le taua o le Tulafono.

Lau Afioga i le Fofoga Fetalai, o le igoa o le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013. Pei o le mea lea ua ou tulai atu ai, uunaia le soifua maloloina, faatoa fai nei? Sa tatou ala ai.....

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Lau Afioga i le Fofoga Fetalai, e talitonu na vaeluaina le Soifua Maloloina i le Ofisa o le Soifua Maloloina ma le ofisa i gauta o le National Health Service mo fuafuaga ia ina ia matua tapenaina. Ao le taimi lenei, e pei lava ona ou fai atu e puupuu lava se manatu, vaai faavave e le o lelei le auunaga a le falemai. Ao le tatou Tulafono lea e fai mai, e uunaia le faaleleia o le Soifua Maloloina pei o le tulaga lea lau Afioga.

O le vaega lea o lo o faia faamaumauga, le Health Side ma tapenapenaga, o le agaga tonu lava lena o le Tulafono lea ua toe aumai nei e fai se isi vaega faapitoa mo le uunaia, a lea ua uma ona uunaia. O le mea lea e taumolimoli atu lau Afioga, o le mea e sili ona taua o le service, o le matua pau lava o le service a le ofisa o le Soifua Maloloina, ae o lea o le a matua fai lenei mea o le uunaia pe tatou te le iloa, ua leva lava ona soifua mai ai, o le agaga ia faaleleia mea ua faaletonu i le taimi lenei e sili atu na i lo le folasaga lenei.

O le folasaga lea ua tulai mai nei is a real another o le isi Ministry atoa, lea o le a tele tupe e alu ai ao le auunaga is important lena e lack. O le mea lea e tulai mai that it is consider i fomai lau susuga i le Minisita ia lava a tatou fomai ma tele totogi. Ao le mea lenei, o lea foi o le a afio le Komiti Faatonu is a complete miro gin le mea lea o le a toe faigata e taitai ai le Afioga i le Palemia.

Lau Afioga i le Palemia, o le tele ia o galuega e feagai ma lau Afioga i le Taitaifono i le Komiti lenei, sei silasila i lipoti na e avatu. Sei e silasila i au Ministries, i lalo i au Minisita ma faaletonu, tele ia o itu taua e taua atu nai lo le mea lea, o le a le mea lea na o le uunaia o le soifua maloloina now you have another Ministries coming out, expensive ae le lelei ai le auunaga, I am rather le malosi atoa e combine ina ia lelei le service. Tolu i le fa itula o nonofo tagata ae o lea e tau faalelei le service, o a igoa service e tau faalelei o lea e leaga le service? Faamolemole o le fautuaga i le Tulafono lenei, faalelei le tatou service ae aua le toe faia isi mea e alu ai tupe. O tatou lea e gau, lea e aitalafu taatia tulou lava le upu nei sese le upu, o lo o utiuti le tatou faasoa, o le sao lena. A fesili o le a le mea lea e fai, e uunaia le a? Po a ia mea na fai? E le o le mea lena na vaelua ai e monitor e latou ma le vaega lea o le Health? O a ona tua, fa, lima itula o nonofo that is in God, o lea o le a toe fai le isi Ministry atoa e alu ai tupe.....

FOFOGA FETALAI: O lea ua maua le saunoaga a le sui usufono mamalu ma e manatu e anoa ma taua le finagalo ua faaalua. Ou te faamalulu atu ona o lea ua tatou taunuu i le taimi malolo masani, o le a tuu atu le avanoa e faaauau ai finagalo o sui usufono mamalu o lo o faaalua i le Tulafono pe a tatou talii mai i le tatou malologa masani o le taeao.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Na faataatia ese Taulumaga a le Fono Aoa mo lana malologa masani i le itula e 10.40 i le taeao ma toe faaauau i le itula e 11.22 i le taeao.

FOFOGA FETALAI: E i ai le talitonuga ua maua le faasiligamalosia aua le palegaaau o le taliga o le sua i lenei aso. O lea ua taumasuasua le ipu ma tutumu falesaito i meaai faaleagaga i le vaveao analeila i le paia ma le mamalu o le tatou Maota. O lea foi ua tali la outou malu taeao, o nei foi i le aoauli o le a toe i ai tulaga o tiuga ma faaaloaloga e pei ona silafia e le tatou Maota le alo mai o le afioga i le alii faipule lea ua maua ua le nofoia lona nofoa ae ua agai e sauni mai faaaloaloga mo le tatou Maota i lenei vaega o le aoauli. Ae malo le onosai faafetai faapalepale i le paia ma le mamalu maualuga o le tatou Maota aua le tauavagameaina o le tatou galuega.

E faia le tatou malologa o faasolo felafolafoaiga e ala i le Tulafono a le Matagaluega o le Soifua Maloloina i le faalauiloaina o le uunaia o le soifua maloloina i ona vaega eseese. Tulai mai lau Afioga i le sui usufono mamalu mo Vaisigano Nu. 2, ona sosoo ai lea ma le sui usufono mamalu mo Aleipata Itupa i Lalo ma le sui usufono mamalu mo Faleata Sisifo.

Tofa MOTUOPUAA UIFAGASA AISOLI VAAI (Vaisigano Nu. 2): Lau Afioga i le Fofoga Fetalai faafetai mo le avanoa. E fia fai se manatu i lenei Tulafono. Ona o le taimi ua puupuu, o le a faapuupuu atu foi se manatu.

O lou manatu ua tele ina ausia e nisi o finagalo ua faapena ona uma ona faaali o latou manatu i lenei mataupu. Ao sou lagona lau Afioga i le Fofoga Fetalai ona o lenei Tulafono lea ua ou vaai atu pei o se isi Matagaluega fou o le a toe fai foi, le isi Ministry. O le a fai lona CEO pei ona saunoa foi i ai nisi o sui ua tea atu. O lou manatu ma lau tilotilo i le ofisa o le Soifua Maloloina o lo o i ai nei, a e silasila foi ua tele le administration ae laititi le faatinoga o galuega, ae silasila foi i le Ministry of Health, o le Ministry lava ia e ese le National Health Services ma le.....e 130 employees 9 ACEO ae o le latou function na o le regulate ma monitor lea foi la o le a toe faaopoopo atu ma lenei administration. O a la mea a le National Health Services ma isi na fai i aso ua tuanai? O lea ou te piitia ai le finagalo o se tasi o uso a fomaini le Afioga i le sui usufono mo Falealupo, e le o efficient le administrate ina o mea nei. Le sau o le suka ma le toto maualuga lea e sau ai nei e matautia, e le faaitiitia, ta te vaai lava i ai ma le faanoanoa ona o le tele o le suka ma le toto maualuga o lo o ua.....sa i ai sou manatu i le mea lea o le Health Education, le Department lea e i ai nei na tataua ona faamalosi, ave i ai tupe. O se manatu ua tataua ona creating i radical policies a le Malo i le mea lava leni o le health promotion, ae le o le toe fai o se isi matata fou CEO fou, ma le staff fou. O le manatu autu lena o lau faamatalaga i le Tulafono lea ua aumai.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

E le o efficient le administration, le faatinoga o le.....ua tatou vaai nei i siva ia e fai, na fai muamua foi siva ae totogi tagata e o mai e sisiva lea foi e vaai atu ua toe fai foi. Fai se mea mautu, fai se mea e lelei, fai se mea e te iloa e i ai sona iuga lelei, ae le o se Tulafono e.....aemaise ia feel good, ia do something but e effective pe leai. E pei o le faamatalaga lena lau Afioga i le Fofoga Fetalai e tuutuu atu manatu i tafatafa o le Malo sei toe manatunatu i ai. O le atunuu lenei e 180,000, ao lenei.....ou te iloa lava e le o lelei ona faatino le faiga o le galuega. E le o....e tatau ona nonofo lelei i lalo ma toe plan lelei le faiga o se strategic e foia ai le....O le mala le mea lenei o le suka ma le toto maualuga e le toe alu i lalo, e sau lava i luga le mea lea ou te tilotilo atu i ai.

Lau Afioga i le Fofoga Fetalai, e pei o se manatu puupuu lena i le Tulafono. Manuia le Fono i lenei aso.

FOFOGA FETALAI: Malo faafetai. Faafetai mo le faamanatu ma le saunoaga a le sui usufono. Tulai mai le sui usufono mo Aleipata Itupa i Lalo, lau Afioga i le Tui Atua Faanofonofu.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga o le Fono faapea le mamalu o sui usufono. E tulai atu e fai sina fagogo laitiiti e uiga i le.....ua tele foi nai tala ua faapea mai e le lelei le auaunaga a le falemai. O le tala puupuu lau Afioga ma le faaaloalo, o au sa ou i le falemai anapo sa sii le matou mai i Motootua i le Emergency, masalo po o le.....se taimi o le afiafi ua pogisa. O le mai ua sii atu ae oso mai timuga ona ave lea i le A & E. E lagona foi le mafanafana o le loto pe afai e lelei se auaunga ma o lea ua ou faalogologo i saunoaga a nisi o sui usufono ua tuuaia lava le tatou Matagaluega i le lelei o le auaunaga, e le gata i le faatinoina o le galuega ae e le o lelei foi mo lenei vaitau aemaise o le Afioga.....po o nisi o sui sa galulue i le falemai. Ua lagona ai foi le loto faanoanoa ona o anapo sa ou vaai tino ai i gaoioiga a alii fomai ma tamaitai aemaise o latou o lo o galulue i le falemai. E manaia foi la pe a ou tulai atu e faapaleni laititi le tele o le faalelelei ma le lelei lea o le a ou tau atua.

Ina ua taunuu atu le matou mai i le falemai anapo, sa o mai le tama foi lea le orderly ma fesoasoani e sii le mai aua e lapoa toe mamafa le mai, avatu lea faataatia i le moega pisi loa si teine tausimai e aumai mea masani foi ia e faaoo ai le okesene, gaoioiga masani lava o emergency pe a taunuu atu i maota gasegase. I lea lava taimi sa ou sau aumai le nofoa ma nofo atu i tua ma ou tapuai ai i le matou mai. Sa ma talanoa ma si tama fomai masalo o ia lea e vaaia le au tiute, ou te le iloa pe iloa au e si tama ae o le matua tamalii o lea fomai i lana ia foi auaunaga. Sa ou vaaia ai foi se tasi o tamaitai fomai la e pisi pei se x-ray la e sau ma ia ai o alu e siaki ma vaai.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Sa nofonofu i le isi potu i talaatu o au le isi tamaitai ma lana teutusi paepae lapoa pei se mea e foliga mai sa fai se x-ray, o le isi itu agavale o au sa ou matauina ai se tasi o tama matua o lo o sii e lana fanau faapea foi ma le tagata galue i le falemai pei e foliga mai e ave e faataele, ao si ana fanau o la e pisi e tapena le moega e tofa ai le alii lea ua ave e fai lana taelega.

I le isi itu sa faapea ona tauvalaau le tama i tagata e o mai i a latou numera mo le faagasolosologa mai i totonu o le vaaiga o le isi fomai. O lona uiga pe toatolu fomai sa galulue i le taimi e tasi. I le faagasologa o le falemai i lau maitau, e le gata i le pisi e le gata i le toatele o tagata e gasolo atu i le falemai ao le tele o le auaunaga. I lau tilotilo e faatusatusa i auaunaga faafalemai i fafo, they true professionals e le gata i le faatinoga o galuega o le latou auaunaga o latou laei sa fai, aua e eseese uma toniga a tagata.

O le isi vaega e ofu o latou ofu lanumoana ae i ai ofu papae i totonu, o le isi vaega e plain cloth a e pei o le vaega lea e....le vasega lea o fomai, ao le mea lea e matauina ai ma lou loto fiafia tele, o le auaunaga na faailoa e latou na tofofi i ai, aemaise latou ia e i ai le tomamaitai faapitoa e pei o alii fomai, tamaitai fomai ma tamaitai tausimai faapea foi ma tagata e i ai le security, aua tasi lena mea na ou vaai i ai anapo, e alu atu le isi taulealea e foliga mai o se tagata e faaletaupule tele le soifua e folifoli lava i taimi pei e ita ai sa fasi e nisi se isi o lona aiga na avatu i le falemai, na avatu lava i le wheelchair o la ou te i ai ae mulimuli atu ai ma le security e tau ave le isi tama i tua o la e tau faavesivesi pei e fia fusu i se tagata.

O mea uma nei lau Afioga i le Fofoga Fetalai ua ou tau atua, e tau rebath ai saunoaga a sui ua tuanai e faapea ua matua tele le faaletonu i le auaunaga. Atonu e eseese o tatou manatu ma lagona pe afai se experience o le tagata lea e asiasi i le falemai.

Tofa Motuopuaa Uifagasa Aisoli Vaai: Lau Afioga i le Fofoga Fetalai...

FOFOGA FETALAI: Malie le sui usufono o lo o saunoa, sei tuu atu le avanoa i le faauilavea a le sui usufono.

Tofa Motuopuaa Uifagasa Aisoli Vaai: Malo, e lei malamalama le sui usufono i le uiga o le faamatalaga. O lea tatou te talanoa i le administration. O le auaunaga lava faafomai, la e fai i uta e fomai o le matua selau pasene, ae tatou te le o talanoa i auaunaga faafomai ma le services, a o lea tatou te talanoa i le administration ma le Health Promotion Board. Ma le faaaloalo.

FOFOGA FETALAI: Faafetai o lea ua maua le finagalo o le sui usufono. Tulai mai lau Afioga i le Palemia.

17 TESEMA 2013

Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 – faitauga faalua

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea foi lena sa le tutu soo atu ai ona o lea tatou te talanoa i le service delivery, o le auunaga. O lea e saunoa le sui usufono i le auunaga lea i le taimi nei, ae pei o taimi ia sa saunoa ai fomai ia e toalua sa galulue i le falemai i le latou foi taimi, o le matua leaga lava. O lona uiga la, o la e talanoa latou i le latou taimi, a o lea e talanoa le sui usufono anapo i le service delivery o lea o lo o fai i le taimi nei. A o le Tulafono Tau Faaofi o lea e taumafai ia toe faaleleia atili, ia sili atu nai lo le tulaga lea sa i ai anapo.

FOFOGA FETALAI: Malo.

Tofa Motuopuaa Uigafasa Aisoli Vaai: Lau Afioga i le Fofoga Fetalai, ua atili nunumi ai lava i le tulai mai o le Afioga i le Palemia, o lea tatou te talanoa i le Health Promotion Bill. O le tala foi lena sa fai agai i le Health Promotion Bill. A o le taimi na ma i ai ma le sui usufono mo Falealupo, e matautia, e le 100% e 150%. Ma le faaaloalo.

FOFOGA FETALAI: Malo. Ia e le o ni ai avea lau Afioga i le alii fomai, o la e sili ona tumu lau clinic i le vaitau lena ona o lou lelei. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea foi lena na ala ai ona o ese mai le toalua lea, ua le toe moomia i uta ua leaga tele.

FOFOGA FETALAI: Tulai mai le sui usufono mo Vaisigano Nu.2.

Tofa Motuopuaa Uifagasa Aisoli Vaai: Lau Afioga i le Fofoga Fetalai, na ala ona matou o ese ona o le leaga o matou totogi, e sili ai le totogi o nurses i totogi ia na matou totogi ai. Ma le faaaloalo.

FOFOGA FETALAI: Ia, lelei. Aua ia le alo lau foe ma e faanape, o lea ua e aeae i totogi lelei i lena vaitau talu le finau o isi fomai. Ae tulai mai lau Afioga i le sui usufono mamalu mo Aleipata Itupa i Lalo e faaiu mai le saunoaga. Faafetai i lou faaeaea i le Matagaluega.

Afioga TAFUA MALUELUE TAFUA: Faafetai atu i lau Afioga i le Fofoga Fetalai, faafetai foi i le Afioga i le alii fomai o le sa avea ma tagata auauna i lea foi auunaga. E leai o le uiga o lau faamatalaga e fai atu, o lea e relate atu le incident na ou vaai i ai anapo e faamaonia ai le lelei o le auunaga ua i ai i le taimi nei, a o lea ou te malamalama lelei i le Tulafono Tau Faaofi ma lona sini autu, o lea e manino lelei lava i le vaega 4 o le Tulafono Tau Faaofi. E le faapea la o tulai atu o le le malamalama i le Tulafono Tau Faaofi, e leai, o lea e malamalama.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

E pei e aoga le faapaleni o le tatou Palemene, a outou saunoa mai i se mea o faaletonu ona matou talanoa atu foi lea o matou i ni mea o la e o lo o lelei, atonu e manaomia se faalelei i le isi taimi. Ae mo le taimi nei, e matua malie le loto ma fiafia i le auaunaga.

Lau Afioga i le Fofoga Fetalai, e faaiu atu ai se faamatalaga e faapea, o le auaunaga i le taimi nei, e ui lava ina le i maea le tatou falemai o le phase two lea e le i faia o le Out Patient po o le mea e muamua taunuu atu i ai gasegase e manaomia vave le fesoasoani, o le phase two lea o fesoasoani mai fafo e faatino ai le tatou falemai, le Outpatient. E ui la e le i faatinoina le vaega lea o le vaega lua, a o le maitau ma le tilotilo i ai anapo, o le matua lelei ma le lava tapena foi o i latou sa galulue ai.

E faaiu atu ai se faamatalaga faapea lau Afioga, ou te tulai atu e lagolagoina lenei Tulafono Tau Faaofi. O lea lava e sau i le vaega i le vaega, e saolele lava nisi o sui usufono ua faaali o latou finagalo, ae pei o le manino o le Tulafono Tau Faaofi lea e i ai, o le Foundation, o le Promotion Health Foundation. Ou te le iloa la i le faa-Samoa sao po o le a le faa-Samoa o lenei mea. A o le agaga o le promotion lea e faapea mai ii, o le sini autu lava lea e manino. Se i ou toe lauina atu ina ia faafofoga mai i ai aua o lea e fai mai ou te le malamalama. “O sini o le Faalapotopotoga Faavae o le: (a) faalauiloa ma faamallosia le uunaia o le soifua maloloina i tupulaga uma o le faitau aofai o tagata e tusa ai ma faiga faavae o le soifua maloloina o le atunuu; (b) faatupeina o gaoioiga e faasino i le uunaia o le soifua maloloina lelei, saogalemu po o le puipuiga ma le vave ona iloa o faamai; (c) siitia o tulaga faalauiloa o polokalame mo le uunaia o le soifua maloloina lelei i totonu o nuu ma alaalfaga e ala i le lagolago tau tupe i tulaga tau taaloga, o galuega e faamatagofie ai ma le aganuu; ona faasolo ai lava lea i lalo, o le (d) faamallosia o le ola soifua maloloina lelei i totonu o nuu ma alaalfaga ma gaoioiga e lagolago ai e aofia ai le auai ai i tulaga e tulimataia ai le soifua maloloina;” ma...

Ou te tulai atu la e lagolago le vaega lea, ona e taua foi sia faiga fou. E moni o la e ua i ai le isi vaega toatele o le falemai, ae eseese a latou matafaioi, e ese o latou tiute ma galuega ua tofofi i ai. Ae tatou ave le mua ma le faafetai i lea vaega o le Tulafono Tau Faaofi, atonu e i ai lona aoga tele lava.

Lau Afioga i le Fofoga Fetalai, o se manatu lena e fia faaopoopo atu ai, ma e lagolagoina e lou nei sui usufono le tatou mataupu e pei ona talanoaina. Ma le faaaloalo.

FOFOGA FETALAI: Malo saunoa. Ia tulai mai le sui usufono mo Faleata Sisifo.

Tofa LEALAIPEPULU RIMONI AIAFI: Faafetai i lau Afioga mo le avanoa. E momoli foi le agaga faafetai i lau Afioga i le Minisita ma le Matagaluega e tusa ai o le Tulafono Tau Faaofi.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O le faigata o le galuega faa-fomai, tatou te fiu lava e taumafai foi lea i suiga lelei ma suiga e fetuunai ai, e te alu atu loa i le falemai e vaai oe i le 8 i le taeao ae faatoa vaai oe i le 3 i le afiafi, ia e faalii. O le uiga o lau faamatalaga, e faigofie ona measure le performance a le vaega lea, ona e faigofie ona iloa i taimi uma ma aso uma. Ae avatu le faamalo e le faigofie le tou galuega. Aua o mea lava ia tau emergencies cases, o lea ou te vaai i ai leaga sa ou alu foi e vaai lau mai, e lelei lava i lau vaai. Ae pei o le Outpatient lea e pei ona vevesi ai nei, e pei o le vaega lea e tataua ona tilotilo i ai. Sa ou fai la i le Pule Sili o le National Health Services, se i alu e calculate le mea lea ae tilotilo i ai pe talafeagai. Afai e sau 100,000 mai e o atu i le falemai i le tausaga, ona totogi lea i ai o le \$10 foi lea e le Malo ae o i tua e vaai nai fomai i tua aua o lea ua toatele, e vave lava ona alu i lalo se.....pe na o se miliona se mea e alu ai pe le atoa foi i le tausaga, ae tele le faasaoina o mea e fai. Aua o le taimi nei, o la e faaoga e le falemai private doctors, fomai mai tua e o atu e totogi le tupe tele e faigaluega ai. Ua avea la lenei ma mea e tau feteenai ai ma fomai la e i le falemai, aua o lea e pei e totogi i le \$250 fomai ia mai tua i le itula, ae le o oo i le rate lenei nai fomai la e i o. O le isi mea lenei e tataua ona tatou tilotilo i ai.

Ona oo mai lea o lou manatu i le tatou foundation, o le foundation lava i lou iloa, se e pei o ni mea a ni faalapotopotoga tumaoti foi nei e faalagolago i meaaloa foi nei ma ni tupe mai fafo e faatino ai. E pei o le mea lea e fai nei e Bill Gates Foundation. O tagata miliona faapena, ona o lea e fesoasoani lautele faapena. O lou lenei malamalama i le mea e taua o le foundation. Ia tailo i ai i te i ua sese. E le pei o se Matagaluega fou foi lea o lea ua faatu mai nei e fai, aua sa fai foi le Health Foundation, ae ua ou le iloa po o fea ua oo i ai lea mea, ae tasi lea mea aupito taua aua e leaga e link tonu lava i faamai nei tatou te pisa ai nei. O lea la na faatu faatu, ua ta alu atu, ua le iloa po o fea ua oo i ai lea mea. O lea la ua aumai nei le finagalo o le Matagaluega e toe faatu se isi Matagaluega fou.

A ou vaai i le Tala o le Tupe, o le matua tele o tupe a le Malo e alu i le ISP, le mea foi lea o le faaleleia o auaunaga lautele i totonu o Matagaluega a le Malo. O lea na amata ai foi le saunoaga a le Afioga i le Minisita o Tupe i le aso lenei, 'ina ia tuuina atu tupe a le Malo ina ia faaleleia atili ai le faatinoga ma le tautua, le auaunaga i le atunuu.' O lau fesili la, o le tali lea o le toe faapoopo o Matagaluega a le Malo? I lou talitonuga, o la e ua tuu i luga totogi, tuu i luga auaunaga.....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Minisita.

Afioga Hon Tuitama Talalelei Tuitama: Lau Afioga i le Fofoga Fetalai, leai e le amua le taele o le sa o le sui usufono mamalu a o folau i vaatele. Na pau lava le tulaga ua ou tulai atu ai ne i te i ua saga agai pea i ai lona finagalo, e tataua ona faasao, e leai se Matagaluega fou. O le Tulafono Tau Faaofi lenei e le o se Tulafono e faatu ai se Matagaluega fou.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O la e tasi lava le Matagaluega i le taimi lenei, ma a pasia foi le Tulafono Tau Faaofi i le taimi lenei, e tumau lava i le mea e tasi mo le faamalamalamaga lau Afioga.

FOFOGA FETALAI: Malo faamanatu leaga ua agiga soo lava... E leai lava se sui usufono e le i tulai mai sa tapa le mataupu lea, ae faafetai i le faamalamalamaga a lau Afioga i le Minisita. Ia, tulai maia le sui usufono mo Faleata Sisifo, ou te manatu ua lagona lou finagalo, ae agai maia le saunoaga.

Tofa LEALAILEPULE RIMONI AIAFI: Ia, o lau lava o le fiso lau o le tolo, o lea lava tatou te malamalama lau Afioga, o lea ua fai le Matagaluega fou, fai le Board fou, fai le CEO fou, o le Matagaluega le mea. O le uiga o lau tala, e taua le mea, but does it justify e fai ai se Matagaluega fou?

Na tatou ola mai lava, e lua mea a le Matagaluega o le Soifua Maloloina, o le puipui ma le togafiti. E leai la, o lea e i ai le prevention. Ua ou fiu e vaai, aua o le Tulafono Tau Faaofi, ua ou fiu e vaai se faa-Samoa o le promotion, e leai se faa-Samoa aua o le promotion na o le tasi lava le promotion. A o le... e lautele foi lea le faasauga o le mea. O le mea la lea e i ai i le Matagaluega lea a le Ministry of Health, o le tasi lea a latou galuega tele o lo o feagai ma i latou o le promotion. O le fesili la; o a latou mea a fai?

O le mea e aupito sili ona taua o lena e silafia e lau Afioga, o lea faaoa e foi mai nei i le meeting lea na tou i ai nei ma le Minisita mo le Soifua Maloloina, le taua o le mea lea na tatou faatauaina nei o le SPAGHL. Ua pepese ai le lalolagi i le mea taua na faatu e le Minisita mo Tina ma Tamaitai ma matou i le amataga ae toe faaauau e lau Afioga, a o lea na o le tou malaga ae le ave matou. E le afaina, a ua uma le tausaga, ia.....

FOFOGA FETALAI: Agai lau saunoaga i le Tulafono Tau Faaofi, o lea o le a tolaulau mea a le SPAGHL i luma ii. Malie o malaga ia e aumai, na o le Taitaifono lava e tataua ona malaga ai, e le tataua ona outou o ai. Agai le saunoaga i le tatou Tulafono Tau Faaofi.

Tofa LEALAILEPULE RIMONI AIAFI: Ua lelei, faafetai. E faamalulu atu i lau Afioga. Aua e te popole, you are the Chairman, you go all the time. O le mea lea o le SPAGHL lau Afioga, lea e faaoga ai tatou o sui usufono, e le i atoa se tausaga, ae o le matua effective lava o le mea. Leaga foi e alu atu i nuu e faapena e e mulimulitai i o latou taitai. O le a la le mea o le a toe fai ai lenei mea fou ma lenei mea tele e tele le tupe, ae o lea e tele le taimi o tatou e faaoga e promote ai le mea taua lea.

O le isi vaega, a tatou vaai nei i ai i le Televisi ma nusipepa, o le sau o le mea o le pia ma mea faapena i aso uma, ao ma le po, ao ma le po.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Na tatou laga foi i le tatou Komiti e o i ai e fai se Tulafono pe faasalalau mai le latou Ad po o le 10 i le po pe o le 11, le taimi lea ua momoe tamaiti, ae le mafai. E moni o lea e aumai Ad e counter ai, ae ua matua malosi tele ma aggressive le sau o mea nei, ua matua tele le faigata o i ai.

Lau Afioga, i lou lava talitonuga na o lou sui usufono, e le moomia se isi Matagaluega fou e faatu, ae fetuunai galuega a le Matagaluega, o lea ua vaefa le Matagaluega, o lea ua uma ona vaetolu, o lea o le a vaefa. Ia, tailo i ai pe siitia ai ma lelei ai le auunaga. Tatou te naunau uma lava ia lelei. Na o le lua lava mea e fai i le mea lenei o le promotion; “what you eat, is what you are.” Na o le meaai lava ma le exercise. Na pau lava lena o mea e lua. A o le a le isi mea fou e tau mai ia tatou? E leai se isi mea fou, ma ave loa fofu Samoa i le vaega o taulasea. E le tele ni galuega fou ma ni galuega e ese mai i le mea ua silafia e le atunuu ma tatou. E le mafai e lau Afioga i le Minisita ona toe fetuunai mea nei i le toe faatino o se isi Matagaluega e ese mai ai, ae o lo o lava ma totoe tagata faigaluega o lo o i ai. Afai e aumai le afa o le aufaigaluega lea po o le tolu kuata e faatino mea iinei ae totoe iinei na o se sefulu tagata, atonu o le a talafeagai i lou talitonuga. Ae afai.....

FOFOGA FETALAI: Malie le sui usufono o lo o saunoa, ona e vaai atu e taua lou finagalo, o lea lava e tulai mai le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, o lea ua agai soo lava le sui usufono mo Faleata Sasae i le tulaga lea o le Matagaluega fou, a o lea ua aumai lava e ia le tali. O lou tu atu lea e faamaonia, o lea na te silafia le agaga o le Tulafono Tau Faaofi lenei, o le fetuunaiga o le auunaga. O le fetuunaiga la lea e faatino i le Tulafono Tau Faaofi lenei. Na tuu se i ou tali atu ai mulimuli, a o lea ua saunoa mai lava ia, na ou manao la e faaoga lana tautinoga i le faamaoni o le fuafuaga lea e agai i ai le Tulafono Tau Faaofi, e fetuunai le faatinoga o galuega a le Soifua Maloloina, a o lo o tasi lava le Matagaluega lau Afioga.

FOFOGA FETALAI: Malo. Ia, faaiu mai le saunoaga o lea ua malamalama lou finagalo.

Tofa LEALAILEPULE RIMONI AIAFI: Faafetai lava i le Afioga i le Minisita. E tatou te fiu lava e sui le lanu o le fua a Samoa lena e i ou tua lau Afioga, e lanumoana lava ma lanumumu. E fetuunai foi lea, fai le NUS, fai le Polytech, a o mea lava tau aoaoga. Ua fai e latou itutino mavaevae, leaga o lea ua maioi e le faapea e mafai ona... Ae le afaina la lau Afioga, o le a aveese le Matagaluega fou, ae tuu i ai le Pulega fou, atonu e fesoasoani lea i lau.....

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O ou manatu e tuu atu i ina ne i te i ua faatino ae faapea mai e le i avatua se manatu o lenei Itu. Ae ua tatou vaai foi i ai e taua auunaga a le Malo, ae matou te le i ai foi ii e faaleaga se Matagaluega, aua o auunaga lelei, ae tatou faia le mea e talafeagai ma fetau ma Samoa. E le faapea foi o le a mulimulitai Samoa i isi atunuu o le lalolagi, o lea lava e i ai le mea e fetau ma Samoa ia, e fua i lana Tala o le Tupe ma ana ia mea e fai. Aua na matou malaga ma le Afioga i le Minisita mo Tina ma Tamaitai i Thailand lea e maua mai ai le idea lea o le promotion, e faaoga mai le tax o le levy mai le sikareti ma le pia, e fai ai le foundation lea. Ia manatua la e tetele tupe, ae faigata ona fetuunai ia tatou lea vaega.

Ona faaiu lea o se faamatalaga, ia, o le soifua maloloina lava o le mea taua. Ae avea lenei avanoa taua e avatu ai lau faamaisega i le faletua, le Afioga Peseta ma le nofo a alo ona o le tuua o le Malo e le uso foi po o le CEO ia Taulealeausumai aemaise foi ona aiga, aemaise foi le vasega o CEO. Ia outou lototetele, e le faigofie lenei mea. Ae aua foi le avea le galuega ma mea e galo ai ia i tatou le soifua maloloina ma le... a ia faamaisega le Agaga o le Atua ma faamafanafana ona o le tuua o le Malo e se tasi foi o... e tasi foi lea auuna aoga o le tatou Malo. Ia manuia tele le Fonotaga i lenei aso. Faafetai.

FOFOGA FETALAI: Malo faafetai. Ia, tulai mai le sui usufono mo Aana Alofi Nu.3.

Afioga TOELESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Ia, e fia faali foi se manatu i le Tulafono Tau Faaofi ua faataatia i luma o le Maota nei.

Lau Afioga i le Fofoga Fetalai, o se motugaafa, ou te talitonu e taua le vaega o le Foundation, ae o lou talitonuga lau Afioga i le Fofoga Fetalai, e le tatau ona faia o se Foundation e run e le Malo. O le faataitaiga lau Afioga, ona o lou talitonuga afai e need se Health Promotion Foundation, e lelei ona fai pea faa-independent. Afai e i ai ni contributions a le Malo e ave i ai i totonu, ae aua ne i run ina e le Malo e pei ona i ai o se SOE.

Lau Afioga i le Fofoga Fetalai, o le taua o lea vaega ona o lea e maitau atu, o le faanaunautaiga o le Matagaluega, ina ia mafai ona access grants mai fafo. Ou te talitonu afai ae fai le Foundation ae run lava e le Malo, e leai se independent, o lea e manaomia foi e le tele o donors mai fafo. E tatau ona independent, a i ai se share a le Malo e i ai i totonu, e taua lona function o i ai. Ou te talitonu foi lau Afioga i le Fofoga Fetalai, e pei ona taua foi e nisi o sui usufono, o le taimi nei o lo o i ai totoga eseese o le tatou Pulega a le Falemai, o le Kidney Foundation. O isi o le National Health Services ma isi vaega uma o lo o latou faatinoina health promotion po o health awareness specific i a latou vaega. Ou te talitonu ia e sili atu ona taua ona strengthen vaega tonu ia e i ai specific issues ia i lo le fai o se Health Promotion Foundation e separate mai.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

E tatau lava ona fesootai i latou o lo o faia le public health, faia faasalalauga ma faia auala e fesoasoani ai i le atunuu i ni public health issues.

O le tulaga foi o mai i le falemai, ou te talitonu o lo o faatinoina foi e le falemai ia polokalame. O nisi foi o a tatou fomai tutoatasi, o lo o faapea foi ona latou faatinoina. O lou la manatu lau Afioga i le Fofoga Fetalai, e taua ona toe tagatagai le Pulega pe aisea ua ala ai ona faanaunautai e fai le Health Promotion Foundation, ua le mafai e i latou o lo o faatino i le taimi nei ona faatino a latou auunaga. Ou te talitonu o nisi foi o tausaga ua tuanai sa malolosi ai nisi o Komiti a Tina, o i latou sa faia le tele o le galuega lea i afioaga ma alaafaga, ae ao ona toe faamalosi ia vaega, o lo o faapea ona latou faatinoina auunaga nei. O lou talitonuga e pei foi ona saunoa nisi o sui usufono i le tele o seleni o le a alu i ai i le tapenaga o lea foi Pulega fou o le a fuafua mai. O nisi foi o seleni a outou tagatagai i ai lau Afioga i le Fofoga Fetalai, pei o se fuafuaga o lo o i ai, a faapea e fai le Foundation, o nisi o alagatupe e aoga mo le tatou Malo i le atinae o lea o le a toe levy mai i sikareti ma vaega faapea o le a alu uma i le Foundation lea, ae ua faaitiitia ai foi nisi o seleni e faaogaina e le tatou atunuu i lona atinae, aua e le na o le soifua maloloina e aafia mai nisi o vaega o lo o i ai taxes ma levy.

E pei o se vaega lea lau Afioga i le Fofoga Fetalai e avatu ai se manatu. Faafetai.

FOFOGA FETALAI: Malo faafetai saunoa. Ia o le a tuu atu le avanoa mulimuli i le... Ia, se i maea le Taitai o le Itu Agai ona avatu ai lea o le avanoa mulimuli i lau Afioga i le Tamaitai Minisita Lagolago.

Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Faafetai mo le faaaloalo ua tuuina mai aua e le tatau ona lauga le Itu le la o le latou Tulafono Tau Faaofi. Ae ua ou tulai atu ma le agaga faaaloalo lau Afioga i le Fofoga Fetalai faapea le mamalu o le Maota, o le mea muamua e pei ona ou tutulai atu i le taimi ua fano, ona o lau saunoaga e uiga i le Lipoti a le Pule ma Suetusi Sili lea ua i ai lau faaiuga.

O le mea muamua lau Afioga, ou te faamalulu atu, o le agaga mauuluga o lenei Itu, ia tausi le mamalu o le Nofoa, e tausi le mamalu o lau Afioga, e lagolago atu i lau galuega. Ae ona o le tulaga lea ua fai ai lau faaiuga, o le upu moni, e le o se mea fou le mea lea i le Lipoti a le Okika sa faataunuuina a o Fofoga Fetalai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi, e faapea foi le Afioga i le Minisita mo Tina ma Tamaitai, sa mafai lava ona alu le...

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua leva ona uma le tatou Lipoti lea e taua e le Afioga i le Taitai o le Itu Agai.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

FOFOGA FETALAI: Malie le sui usufono o lo o saunoa, o le ala lea o le tau soso atu ma le agaga faaaloalo. Malie lau Afioga i le Taitai o le Itu Agai, o le ala lea o lou tata i le moa o le ala, ae o lea sa avatu le avanoa ona o faiga faavae, e see ese ma le mataupu lea.....

Afioga Hon PALUSALUE FAAPO II: Ioe, e tatau ona faamalamalama lelei, leaga e le o i le Tulafono Tumau lau Faaiuga lea ua fai. Faamalamalama lelei leaga e afaina ai le faagasologa o le tatou galuega. O le ala lea o lou tulai atu.

FOFOGA FETALAI: E te le tau faamalamalamaina. Malie le Taitai o le Itu Agai, e le faatalanoaina Faasilasilaga a le Fofoga Fetalai. O le faatonuga lena. O Faasilasilaga a le Fofoga Fetalai e tuusaunoaina ma e i ai le Pule atoatoa e mausali ana Faaiuga i lana Faasilasilaga. E le fesiligia. O le faasilasilaga lena o lea ua tuuina atu. Tulai mai e saunoa i le mataupu ma le Tulafono Tau Faaofi o lo o talanoaina nei.

Afioga Hon PALUSALUE FAAPO II: Ia, o la e faafogafoga mai le atunuu, ma e lolo lava i lou finagalo e pei ona e saunoa. Ae ona o le gasologa o galuega aemaise o Lipoti e faataoto i le laulau, lea e ala ai ona tulai atu. O le Tulafono Tau Faaofi lau Afioga i le Fofoga Fetalai, o lea ua sausaunoa le Itu lena, e le tele foi sau faamatalaga i ai, ona e le tatau ona faatuina lea vaega. Aisea? E utiuti le faaso a le Malo. Silasila i le utiuti na o le tolu pasene le siitaga? Silasila na o le \$2miliona lea e ave i le siitaga? A o lea e faatu mai lena Matagaluega fou? Tagai ifo i totogi o nai tagata, totogi e faalelei ai le auaunaga o fomai ma teine tausimai. Silasila i teine tausisoifua, ua tele ina faamavae. E mafua i se a?

FOFOGA FETALAI: Malie le Taitai o le Itu Agai sei tuu atu le faauilavea i le saunoaga a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ua faa-fagogo tagiao, o le mea e fia faasao. Ua maea ona tulai atu le Minisita e tau atu fetuunaiga e faia i totonu o le Tulafono Tau Faaofi lena. O le Tulafono Tau Faaofi foi lena, o le Tulafono. O lona uiga e tele lava le taimi a pasi le Tulafono Tau Faaofi, ona sagai loa lea o le Matagaluega e toe faia le fetuunaiga lea. E manaomia lava se taimi, o lea foi e see le Tulafono Tau Faaofi i le Komiti e toe auiliiliina ma toe avanoa ai outou nei ua matua faigata tele ona faamalamalama. O le mea lea o le saili ai i se mea sese, e le maua ai ni ai faaopoopo na o ai toese. O lea ua saunoa atu le Minisita o auala ia e fai ai fetuunaiga ma e lilifa i le itu lea o le puipuiga. O le faalavelave o Tulafono Tau Faaofi nei, ua leva ona avatu Tulafono Tau Faaofi ae tou te le i faitauina.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Ana outou faitauina Tulafono Tau Faaofi nei, ua malamalama le tutulai soo atu o le Minisita e tau atu, o le fetuunaiga le mea lea e fai. Sa ou fautuaina foi le isi sui usufono a o malolo, o le faalavelave o outou, o lea tou te manatu o se mea fou, o se Matagaluega fou.

Lau Afioga i le Fofoga Fetalai, o le tulaga lena ua ou tulai atu ai se i faasao le Taitai o le Itu Agai. Afai e leai se mea na e tapena i ai, ona ou faasaoina lea, ae o lea ua uma ona saunoa atu le Minisita, o le fetuunaiga o tiute ina ia atili faaleleia ai le auunaga a le Soifua Maloloina. O lea foi ua uma na ona tu ae lava o lea faapea mai, leaga, leaga, leaga. O lea foi ua uma ona tali atu se tasi o sui usufono i mea na tutupu anapo na vaai i ai. O le ala foi lena o lea e uunai ai le toatele o tatou Tulafono Tau Faaofi e faataga ai le tautua a tatou fomai i tua e lagolagosua i le galuega a le Soifua Maloloina.

E te manatua le teva lea na fai i le 2005 ea po o le 2006, na teva, ae le i sioti ai le tautua. Aisea? Aua foi o lea ua uma ona tapena e le Malo Tulafono ina ia matua toatele ni fomai i tua e latou te faia le auunaga e lagolagosua i le galuega o lo o faatino e le Soifua Maloloina. Nei, o le isi lena galuega o lo o fai nei, o fomai nei e taamilo i tua, o fomai o lea e fai le latou pisinisi i tua, a o lea foi e faaoga e le Malo ina ia faatino lena vaega o le tautua i le tatou atunuu.

Lau Afioga i le Fofoga Fetalai, e fiu lava la e talau mai vaega e saili ai ai, e le mafai ona maua ai ni ai, leaga e tautala galuega. Lau Afioga i le Fofoga Fetalai, o tulaga na, a alu i fafo, ua faafia ona ou alu i fafo ma ou vaai i faitioga, e oo lava i Niu Sila, faitioga e fia itula o faatali. E fia itula o faatali tagata? E oo lava i mea o le taumafai e o e fai taotoga? E fia masina o faatali isi? Ae a taotoga a tatou? Na o le avatu lava fai loa.

Lau Afioga i le Fofoga Fetalai, e tele naua le mea lea o le gagau ma lafo ae le manatunatu loloto i upu. E tasi lava le mea ia manatua, e tautala lava galuega. Lau Afioga i le Fofoga Fetalai, o lau toe tulai atu lena e fesoasoani i le Taitai o le Itu Agai.

FOFOGA FETALAI: Malo faafetai. Tulai mai le sui usufono mamalu e faaauau le saunoaga.

Afioga Hon PALUSALUE FAAPO II: Faafetai ua maea le faauilavea. O le aitu lava le moomu, pe fetuunai pe a, e manaomia le seleni. Silasila i ai i le saunoaga manino a le Afioga i le Minisita?

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, afai e fetuunai galuega, e fetuunai foi ma tupe. Afai e fetuunai galuega ma tagata, e fetuunai foi ma tupe. E le faapea e fetuunai galuega ae le fetuunaia ma tupe. O le toe faamalamalamaga lena.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

FOFOGA FETALAI: Tulai mai le sui usufono mamalu e faaauau le saunoaga.

Afioga Hon PALUSALUE FAAPO II: O le a ou le toe oo i ai. Ae silasila, Taitaifono le Palemia e pei ona laga, Sui Taitaifono le Minisita, ae faatoa uma nei lava ona fetuutuunai policies a le Malo e le toe i ai ni Minisita i Boards. Na o mea le mautonu ma le femoumouai o faaiuga.

FOFOGA FETALAI: Malie le sui usufono se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, o le mea e fia faasao. O mea o galuega a le Malo faapisinisi, o le tulaga lena, e le toe saofai ai se Minisita, mea faapisinisi. O le galuega lea o le Soifua Maloloina, e le o se pisinisi a le Malo. Ma o le mea lea ua agai i ai le latou fautuaga i le tuualalo, e pei e lelei ona saofai ai le Palemia ii i faaiuga tetele e faatino, aemaise le tulaga lea o le tuputupu pea i luga o le gasegase lea o le faamai oti, pe valu ea pe iva faamai, e i ai le toto maualuga. E mafua i se a? So o se atunuu lava e siisii i luga lona tamaoaiga, e tupu tele ai faamai ia. Aisea? Aua foi ua maualuga le soifuuga, ua lelei taumafa. Ma o le tulaga lena o lea e agai i ai, e tupu pea. Ma o le galuega lea a tatou e fai e le Soifua Maloloina, o le fai o taumafaiga esecese e aofia ai ma faataitaiga o malaga i tua, o aoga. O le mea lena o lea ou te fai atu ai, e sese tele lava le lauga lea na fai e le sui usufono mo Faleata Sisifo, fai mai na o le lua lava mea e agai i ai, na o le meaai ma le koloni. Se i vaai i ai i le faavalevlea o ia manatu? E le lua, e tele. Masalo a oo nei i le taimi e tali mai ai le Minisita, ona ia faamalamalama loa lea o le faavalevlea o ia manatu na aumai e taumamaina ai le soifua maloloina e tuuititia ai gasegase ia, gasegase i le tulaga lea o le soifua ua maualuga tupe maua a tagata, ua maualuga ma ua tele ai foi le fiafia e taumamafa i mea e le tataua ona soona taumamafa ai, o lea foi e taofiofi atu mulipipi, ae o lea lava e toe manao e aumai mulipipi, ae fai mai o le tasi lena vaega e tetele ai gasegase e maua ai.

Ia lau Afioga e le na o meaai foi, e aofia ai ma meainu, o le saunoaga lena a le sui usufono e na o meaai lava ma le koloni, e leai e aofia ai foi ma meainu. Lau Afioga i le Fofoga Fetalai, o lea o le a ou nofo i lalo.

FOFOGA FETALAI: Malo. Ia leaga o lea sa taua le suafa o le sui usufono, ia e le o ni ai i avea, ioe le sui usufono mo Faleata Sisifo.

Tofa Lealailepule Rimoni Aiafi: Ioe, o le a oso le gasegase o le Afioga i le Palemia, ae a tatou taamilo uma i le lalolagi e te fiu e te alu i se mea, e tasi lava le tala a le fomai ia oe, o a au mea na e ai, a o e koloni?

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Aua a tatou tausii lava i le meaai, e lava, ia vaai foi i promotion ia e sau, na o le ai lava ma le koloni, e moni e tele mea ae pei o le mea aupito sili lea ma o faamai ia e mafua nei, e mafua lava i le tausami, what you put in, you bring out. I am big, I am fat, but I am very healthy.

FOFOGA FETALAI: Malo. Ia o le a faoa le taimi o le Afioga i le Taitai o le Itu Agai o lea e tau aoao mai lana....Tulai mai lau Afioga e faaauau mai le saunoaga.

Afioga Hon PALUSALUE FAAPO II: O le ala tonu lava lea o lou taumafai atu o le le consistent o a outou faaiuga, lea foi e lavea ai le Afioga i le Fofoga Fetalai e uiga i le lipoti a le Suetusi Sili.

FOFOGA FETALAI: Le Taitai o le Itu Agai, agai i le Lipoti o lau toe fai atu mulimuli lea.

Afioga Hon PALUSALUE FAAPO II: O le ala lea o lou tulai atu, sei faatutusa a tatou faiga faavae, a sao faiga faavae e mulimulitai ai foi finagalo o le itu lenei, faiga faavae a le Palemene, faiga faavae a le Kapeneta, faiga faavae a le Malo. O le mea lea ou te tutulai atu ai, ina ia le toe fesiligia ai lea, o se....tulafono ua aveese le Minisita, pe pisinisi pe a, o le vaega o le Malo.

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o se mea e fia faasao, o aso ia faatoa ou sau ai i totonu o le Maota o le Fofoga Fetalai i le taimi lena, se e tasi lava le faatonuga e le nofo i lalo, fafo. O le mea lea ou te tulai atu ai ou te faamalo i lau Afioga ona o lou lava onosai ma lou tuu avanoa, ana o le Fofoga Fetalai na i ai i le taimi lena, se na o le le usitai lava fafo ma le maafala.

FOFOGA FETALAI: Ia le Taitai o le Itu Agai, e pei ona ou fai atu...

Afioga Hon Palusalua Faapo II: Ua e usitai i le Palemia?

FOFOGA FETALAI: Alaala i lalo, sit down! O lea o le a ou oo i le itu ou te le manao ou te oo i ai, you never see me bad and don't take advantage of my hospitality, lea ua ou fai atu ia te oe, had to warn you now. A ta o nei e talapipi mea ia e te saunoa mai ai, e leai se vaipanoa e te sao ai, leaga o aiaiga ma faiga faavae e lei faataga faia lau faaiuga, o la ua sau le faaiuga a le loia sili, soli le tulafono. O ai la e te toe faalogo i ai? Aua e te poa le maea ma le popo e pau po.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O le tautinoga ma au upu e te manumanu ma e faaaloalo i le Fofoga Fetalai, tausia la mea na, pau lava na o le mea na ou fai atu ai. Ou te lei taua foi lou suafa, o le tatou ava lena ma le vatapuia, a o lea ua faaaliali mai, o oe lea na liki ai le Lipoti lea. Ia faifai malu mai le faiva. O lea e tautino sa ou tatalo i le Atua tautino mai le tagata aua e le sau faatagata le malaia o se tagata na te olegia lau Faaiuga ma le Faaiuga a le Fofoga Fetalai ma le Faaiuga a le Maota. Le Taitai o le Itu Agai, fuafua mai o lea e fuafua atu, ina ia ulimasao le tatou folauga. Silasila foi i la oulua vanonofo ma Leulumoega, o lea lava ou te mau iumaea, ae ese lena vaitau ese le vaitaimi lenei, o lau Susuga o le Tiakono Tocaina, o le Aoa Fesoasoani matua, ia e amio faa-Aoa, ae aua le taulamua ia te oe lou tau faavevesi ma faatupulaia le tulaga e maua ai lo tatou le femalamalamaai.

Tulai mai e faaauau lau saunoaga agai i le Tulafono, aua e te toe taua lape ia o mea ia na ou faamatala atu nei.

Afioga Hon PALUSALUE FAAPO II: Leai o lou faaaloalo i lau Afioga.

FOFOGA FETALAI: Faatino le faaaloalo.

Afioga Hon PALUSALUE FAAPO II: O lau faaaloalo o le a uma ai foi ma lau lauga.

FOFOGA FETALAI: Ia lena. Afai o le tulaga lena ia....faafetai.

Afioga Hon PALUSALUE FAAPO II: Silasila ou te faaaloalo i lau Afioga, ae ou te faanoanoa, ona o lou faalogo i saunoaga a le Afioga i le Palemia, se o au ua masani i le tuli i fafo ma le Maota lenei, tuli aveese le Nofoa, ua ou matuai ou masani ai lava. Ae lau Afioga, leai ou te faamamalu, ioe, leaga e faigata Nofoa o le Maota lenei, ae pau lava lea o le mea e fia faasao, ou te lei likia se Lipoti a le Okika, ioe, e le o au, e le iloa po o se isi lava o le itu lena, na likia le Lipoti a le Okika.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te faafetai atili lava i lau Afioga, ana o se isi lava Fofoga Fetalai ae tofotofa soo oe, ua leva ona fai se faaiuga.

FOFOGA FETALAI: Ia malie ia lau Afioga i le Taitai o le atunuu, faai mai le saunoaga le Taitai o le Itu Agai.

Afioga Hon PALUSALUE FAAPO II: Faafetai tele mo le avanoa aua a ou oo foi isi mataupu ia, ia ua toe tu ae foi le Afioga i le Palemia, ae o lenei aso faafetai mo le faaaloalo ua tuuina mai, ia manuia le tatou Fono faafetai.

17 TESEMA 2013

Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 – faitauga faalua

FOFOGA FETALAI: Ia lau Afioga i le Minisita Lagolago o le avanoa mulimuli lea ona tali ai lea o lau Afioga i le Minisita mo le Soifua Maloloina.

Afioga Hon GATOLOAIFAANA AMATAGA ALESANA GIDLOW (Faasalelega Nu. 1): Faafetai tele lava i lau Afioga i le Fofoga Fetalai mo le avanoa, e avatu foi le faamalo i le faautaga pototo ma le tofa loloto e faafoeina ai le tatou Fonotaga i lenei taeao.

Ae ou te tulai atu lava lau Afioga i le Fofoga Fetalai ona o le taua lava o lenei Tulafono Tau Faaofi poo lenei foi vaega fou o lo o taumafai le tatou Matagaluega o le Soifua Maloloina e tau faaofi mai faalapotopotoga nei aua lava le uunaia po o le faalauiloina o le soifua maloloina lautele.

E muamua ona fia faaleo le agaga faafetai i lau Afioga i le Minisita aemaise foi le Matagaluega i le mamao o le silasila ma le loloto o le tagai, aua o le soifua maloloina lava ia, ia e leai ma se tasi e mafai ona toe tautala i ai ua lausilafia ma tatou faalologo foi i afaina o lo o i ai le tatou atunuu e tusa ai ma le tulaga o le soifua maloloina. Ae a tatou vaavaai foi lau Afioga i le Fofoga Fetalai i le seleni tele foi o lo o faaavanoaina nei aua lava togafitiga o le soifua maloloina, ou te lagona ua tataua ona amata ona tagatagai ma vaavaai i ni auala e mafai ai ona foia lea faafitauli e faaitiitia ai seleni o lo o tatou faalumia i ia tulaga faatogafitiga faaalu agai i nisi mea, ae le mafai ona tatou agai i lenei tulaga pe a le faataaitiaina ni auala e mafai ai ona puipuia lelei, mafai ai ona faalauiloa lelei tu ma aga o le tatou soifuaga o lo o mafua ai ona tulai mai le soifua maloloina le talafeagai i totonu o le tatou atunuu. O lea e avatu ai le agaga faafetai tele i lau Afioga i le Minisita i le tagatagai mamao ma le vaavaai loloto i auala eseese, e mafai ai ona tatou foia le tatou seleni o lo o faaalu nei i togafitiga o gasegase eseese o le tatou atunuu. O lea foi ua faalogologo ma le totoa i lenei taeao, ia ua faaopoopo foi le isi \$1miliona e totogi ai togafitiga i atunuu i fafo, aua lava le taumafaiga ina ia i ai se toomaga o nai o tatou tagata ua le mafai ona maua togafitiga eseese iinei i Samoa, ae o lo o sulufai atu i atunuu mamao. O tu lava ia ma gaoioiga a lo tatou Malo e taumafai ai e fesoasoani i e ua le o maua ni fesoasoani i totonu o le tatou atunuu e tusa ai ma gasegase eseese.

Lau Afioga i le Fofoga Fetalai, ou te lagona so o se mea fou lava e faapea foi lava ona masalomia, e faapea foi ona pei e teena. Ae a tatou vaavaai i ni suiga fou ua i ai lo tatou atunuu ma faamanuiaga o lo o i ai nei, o le faataitaiga lava, o le suiga o auala, tele le au tetee na i ai, fai mai o le a tele e o le a maliliu. A o lenei vaitau i le tatou vaavaai atu i ai, ia toeitiiti lava masalo lava o aiga taitasi ua tofua lava ma le taavale, a o le mea sa i ai muamua e lei mafai ona faatauina se sa iinei i Samoa, ona o le taugata foi i na vaitaimi o le tau o le.....

Afioga Hon Palusalua Faapo II: Lau Afioga i le Fofoga Fetalai o se mea e fia faasao i le saunoaga a le sui usufono mamalu.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

FOFOGA FETALAI: Ia o le a se mea e fia faasao?

Afioga Hon Palusalua Faapo II: O le au maliliu, lea e fai mai e leai nisi le au maliliu pe a sui auala.

FOFOGA FETALAI: Ia e le.....malie le Taitai o le Itu Agai, o le a lava le....

Afioga Hon Palusalua Faapo II: A silasila i ai i le au maliliu lea e tupu nei ona o taavale, ia tatou tuu fesilisili lava po o le a le mafuaaga?

FOFOGA FETALAI: Ia o lea ua maua le faauilavea.

Afioga Hon Palusalua Faapo II: I, o le mea e fia faasao, e tele le au maliliu lea ua i ai.

FOFOGA FETALAI: Ia o faalavelave lava ia e tutupu mai pea e le faapea o le suiga o le itu. Ae tulai mai lau Afioga i le sui usufono.

Afioga Hon GATOLOAIFAANA AMATAGA ALESANA GIDLOW: Faafetai lava i lau Afioga i le Fofoga Fetalai, faafetai foi i le faauilavea a le Afioga i le Taitai o le Itu Agai, ae pau lava lau talosaga lau Afioga i le Fofoga Fetalai, a tatou sailiili i mafuaaga o ia maliu e pei ona saunoa i ai, e le o le itu o le auala, a o aga a tagata o le aveina sa ma taavale i luga o le tatou auala.

Ae sei faaaauu pea la se faamatalaga. O suiga lava la nei e le faigofie ona tatou taliaina, ae o le Taitai ma le Taitai mataala, po o le a lava o le vaai i le lumanai, ona faapena lea ona taumafai e uli atu agai i ai se mea fou ina ia tulai mai ai ni suiga se fetuunaiga e lelei ma mautu ma vaavaai tatou toe tepa mai i tua, oi, o le matuai matagofie lava o le mea ua i ai nei lo tatou olaga. E faapena la ia ni challenge po o ni luitau foi e faafeagai ma i tatou i lea taimi ma lea taimi.

O lea lau Afioga i le Fofoga Fetalai o lou tulai atu e avatu foi le agaga faafetai i se tofa ua ae e tuu ai le faatumutumuga o le taitaiga o le Malo le Afioga i le Palemia ave ma Taitaifono i lea faalapotopotoga, aua a faapea ua tatou ave so tatou faamuamua i le soifua maloloina o tatou tagata, e tatau foi la ona ave i ai le faamuamua a taitai o le Malo, o lea faafetai tele mo lea tofa, faafetai ua faaaliali mai ai i i ma faamausali ai le faamuamua e le tatou Malo o le soifua maloloina o tagatanuu o Samoa.

Lau Afioga i le Fofoga Fetalai ne'i faaumi se tala, ae toe fesili foi nisi masalo e le o sao le upu lea o le uunaia o le soifua maloloina. Ae po o le a la se finagalo, ae pe suia le uunaia i le faalauiloa, promote, promote, faalauiloa le soifua maloloina ina ia mafai ona ofi-gofie i finagalo ma malamalamaaga o tagata le agaga o leni Faalapotopotoga o le a faavaeina.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

E pei o nai manatu na lau Afioga i le Fofoga Fetalai, e avatu ai lou agaga faafetai ma avatu ai ma le lagolago a lenei itumalo o Faasaleleaga Nu. 1 i le faavae o le a tatou agai i ai aua le faalauleleiina atili o le soifua maloloina i totonu o Samoa. Faafetai tele lava mo le avanoa.

FOFOGA FETALAI: Malo. Ia tulai mai lau Afioga i le Minisita mo le Soifua Maloloina e ana ia le Tulafono, e manatu ua maua ma malamalama uma le tulaga pe a tali mai lau Afioga i manatu na faaalua e sui usufono mamalu.

Afioga Hon TUITAMA TALALELEI TUITAMA: Lau Afioga i le Fofoga Fetalai faafetai o lea ua matua saausi ia le felafolafoaiga i fefaaaliaiga o taofi, atoa foi ma le fautuaga faasoa mai ma le fetufaaiga. Ia o le agaga lava ina ia matagofie le Tulafono. E le faateia la lou nei tagata e tusa ai ma mataupu laga, e ui lava ona e faafoliga e matuia i nisi tulaga ia ma mamao i sasae ma sisifo ia nisi faaupuga, ia ae o le tau faalaeiina lava o finagalo ma taofi ina ia tau foliga mai ai o lo o agai i le Tulafono, ae o lo o manino lava le Tulafono ia e le o se Tulafono e toe tusia pe toe faafouina o la e taoto i luma o sui usufono taitoatasi, ia ua maea foi ona silasila i ai ma faitau maea i ai. Ae o le a ou taumafai e avatu se faamatalaga aua o le tele o taofi sa faaalua, ia ua fetalai lava le Maota, pei o lea ua laga mai e le isi sui usufono ae ua tali i ai le isi sui usufono. O lenei lava la ua maua ai le tele o tali o manatu na faaalua, o la ua uma ona toe tali lava e latou a latou lava fesili. Ae o lea la o le a ou otooto atua i se tulaga lautele ina ia faamalalamalama ai le aano moni o le taumafaga lenei o lo o taumafai i ai le soifua maloloina.

O le a ou amata mai i le Tulafono, o le isi lea vaega o lea e fenumiai i isi, o le Tulafono o le Tulafono o le Uunaia o le Soifua Maloloina po o le Health Promotion. Ia a o le anoano o taofi ia na aumai, o lea e aumai i le auaunaga faa-soifua maloloina. O lea e mulimuli mai le Tulafono Tau Faaofi o le Auaunaga, a o lea ua uma ona soalaupule, o lona uiga o lou faamoemoe, a oo atu loa ina talanoa le Tulafono Tau Faaofi o le Auaunaga, e leai se isi e toe faaalua se manatu aua o lea ua uma ona faaali i le Tulafono Tau Faaofi sese. E ui lava la i lea, faafetai foi o lea tali ai ma le isi Tulafono Tau Faaofi lea e le i oo mai. A o vaega ia sa agai totonu i le Tulafono Tau Faaofi, o lea e manino lava le Tulafono Tau Faaofi, Health Promotion, Foundation, o le Tulafono Tau Faaofi lenei.

O le agaga o le Tulafono Tau Faaofi lenei, aua o lea ua faaali nei, se i ou tali muamua atu lava i mea nei e faanofu filemu ai le maemaea lea sa faaalua. Ua faapea mai nisi, o le a foi lenei Matagaluega? E tiga lava ona fai atu e le o se Matagaluega, o la e tasi le Matagaluega. O la e tasi le Matagaluega ae lau mai lava o le Matagaluega, o le Pulega, o a uma mea ia, e manino lava le Tulafono Tau Faaofi ia, o le vaega o le faaleleia o le Matagaluega. Ioe, o le fetuunaiga o tiute.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O lona uiga la a toe fai nei, o isi tagata faigaluega fou, ma e foliga mai ai e peiseai o le uunaia o le soifua maloloina, o se mea fou, po o se mea o lea faatoa potopoto e fai. Mo le silafia, a lea e feoloolo lava nai tagata malamalama lea ou te iloa o lea e i ii, aua na ona fai mai lava, o la e fai i aso uma, na fai mai lava anamua e oo mai lava i le aso, o lea e fai lava, prevention, promotion.

Ia, o le agaga lena lau Afioga, aua ua faafa lava ona tu i luga le sui usufono lea, a o lea ua toe tulai mai foi.

FOFOGA FETALAI: Malie lau Afioga i le Minisita sei avatu le avanoa. O le a le isi tulaga le sui usufono mo Faleata Sisifo?

Tofa Lealailepule Rimoni Aiafi: Lau Afioga e tataua lava ona faamanino le vaega lea, aua e le o tetee lou tagata ma le tele o nei sui usufono i le galuega lea e fuafua e fai, ae ao lava ona faasao leaga e fiu lava e fetuunai, o le Matagaluega fou le mea lea e faatu, e i ai lona Komiti Faafoe, e i ai le CEO fou, ma vaega uma faapena. A na faapea mai o lea e vavae mai se vaega e faatu foi lele i se division po o se vaega faapena, ona lelei lea.

FOFOGA FETALAI: Ia, o lea ua maua le finagalo o le sui usufono mo Faleata Sisifo. Mo le faasaoina o lou taimi, tulai mai le sui usufono mamalu.

Tofa Levaopolo Talatonu: Lau Afioga i le Fofoga Fetalai, na o se mea lava e fia faasao i le saunoaga a le Minisita. O le mea lea o le promotion, e le mafai ona faia e ni aitu, vaeatu le mamalu o le Fono, e faatino e le aufaigaluega e ala i le auaunaga. O lea foi la ua taua nei e le Afioga i le Minisita le tulaga i le auga o aute o le fetuunaiga. O lau fesili atu la i lau Afioga i le Minisita, po o le fetuunaiga fou lea o le Tulafono Tau Faaofi lea ua toe aapa atu ai le Palemia e Taitaifono. O le fesili la; aisea ua toe aapa atu ai? O lona uiga e fesiligia le fetuunaiga tuai o lo o i ai.

FOFOGA FETALAI: O lea ua maua le saunoaga a le sui usufono. Se i tulai mai o lea ua maua le atugaluga. Se i tulai mai lau Afioga i le Minisita e faaauau lau tali.

Afioga Hon TUITAMA TALALELEI TUITAMA: A finagalo lau Afioga e tuu nisi avanoa taitasi e toe saunoa mai ai, o le a mafai lava ona ou onosai se i maea lelei mai nisi fesili ua galo ona fai ona ou agai atu loa lea e tali faatasi.

FOFOGA FETALAI: Malie lau Afioga e faaauau le tali mai.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Afioga Hon TUITAMA TALALELEI TUITAMA: O le vaega lea sa saunoa i ai le sui usufono mo Gagaemauga Nu.1, o lea lava e manino, o le Pulega, o le aufaigaluega fou. E le lava le onosai. Mo le silafia lau Afioga, o le isi lea vaega sa ou taumafai e faamalamalama. O le fetuunaiga o le galuega, e le o ni tagata fou. O lea ua amata mai, o le galuega lea sa fai mai anamua, o lea lava e fai, e oo mai lava i le taimi leni o la e faatino e le Matagaluega o le Ministry of Health (MOH). O lona uiga, e le o se mea faatoa tau amata, o la e i ai tagata faigaluega o la e faatinoina. A o le agaga o le mea lea, o le fetuunaiga lea o le galuega, o tagata lava ia o lea o le a faatinoina. O le ala lea o le avatua o ni tagata faigaluega i totonu ii, o la e lava e i ai tagata faigaluega o lo o faatinoina e aofia ai ma le tatou section foi lea mo le silasila i taumafa lea sa saunoa i ai le sui usufono mo Faleata Sisifo na o le taumafa lava ma le exercise. Ia, o le agaga lena, o le fetuunaiga lena. Na pau lava le vaega o i latou foi o lo o faapitoa i ai le tomai lea i a latou galuega o la e fai nei, o lea foi atonu o se isi foi lena o le a filifili mai ai se CEO e tauavea le tulaga o le galuega lea. A o la e i ai tagata o lo o faatinoina le galuega lea, o i latou la ia pe tusa ma le toa 16 ma ona tupu i latou o lea o lo o i ai nei i totonu o le Ministry. O lea o le a amatalia le faatinoga o galuega i totonu o le galuega leni.

FOFOGA FETALAI: Malie lau Afioga i le Minisita se i tulai mai le Afioga i le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama. O le manaia ia o le faamalamalama a lau Afioga i le Minisita, ae o lea ua toe faalavea mai lava, ua toe tofia le CEO. O lona uiga e i ai se Matagaluega e lua ni CEO, o le CEO o lo o i ai nei ma le CEO o i? O le ala lea o le taumafai atu o le Itu leni, aua le faanunumia foi lele, o le a le leaga pe a e tau maia o le Pule e fou? O lea e fai le CEO. E tusa ai o lau faamalamalama, o le a lua CEO o le Matagaluega e tasi.

FOFOGA FETALAI: O lea ua maua le saunoaga a le sui usufono. Tulai mai lau Afioga i le Minisita, e pule oe pe e te tali i ni fesili fou. Agai lau faamalamalama i le tulaga ua maea ona...

Afioga Hon TUITAMA TALALELEI TUITAMA: E le toe maimauina foi sou taimi i tagata vaivai faapea, ae o le a agai pea le faamalamalama o le mataupu ia, o lea e toatele lea e fia faafofoga i le tulaga o le tali atu i mea ia.

Ona oo mai lea o sau faamatalaga lau Afioga, o le agaga la o leni faamoemoe o le uunaia, e lua vaega o le auaunaga, pei o lea ou te taumafai e tuu eseese atu, o le auaunaga ma le uunaia o le soifua maloloina, po o le puipuia mai e aua ne i oo i le tulaga lea.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O lea ua lagona i totonu o le Maota lea, e fia miliona ua alu, ua faapea mai, o le a le mea ua maumau ai le ave ii ae le ave i le auaunaga e faalelei le auaunaga lea. E amata mai lava ona tatou galulue mai i le Matagaluega lenei, e te fiu e agai i le togafitiga, e le taitai ona uma mai. O le faaupuga lea ua masani ai tatou, ‘don’t treat the symptom, treat the course’. E te alu e treat le course ina ia aua ai ne i maua ni mai ii. O le agaga la lea e i ii, a faaitiitia gasegase lea e alu ai le miliona ma miliona o tatou tupe, e te le agai e togafiti mai ia. This is the end of the stadium, you go to the course. O le mafuaaga la o gasegase ia e maua ai tatou tupe, e mai le lima tuuvale o le soifua ma le le lelei puipuia o le olaga, ae le i maua i le mai. O le agaga o le Tulafono Tau Faaofi, puipui ia aua ne i mai, ‘prevention is better than cure.’ O le agaga lena o le Tulafono Tau Faaofi lea. O taumafaiga uma la nei, o lea e agai i meataumafa, faaitiitia le sikareti, faaitiitia le inu ava, toaga e exercise. Ia o mea ia, ma ia taumafa tatau. A o mea ia o lea e agai e le faamoemoe lenei, o lona uiga i le faaupuga o lea o lo o agai nei i ai le lalolagi atoa ma le WTO, o le changing of lifetime. Ia sui le soifuaga, sui aga ma tu, sui le tulaga e agai i ai lau faamuamua. Ave lau faamuamua i lou soifua maloloina, ae aua e te faatalitali se i e mai suka ona e faatoa alu lea e sue le fualaau e togafiti ai le suka, a o lea sa mafai ona prevent, how to become diabetics.

E maimau le taimi lau Afioga ae ua tu faafia mai.

FOFOGA FETALAI: O se mea sa taua i lau lauga le sui usufono mo Gagaemauga Nu.2?

Tofa Levaopolo Talatonu: Ia, o le mea tonu lava lea sa ou alu atu ai i lau lauga.

FOFOGA FETALAI: Ia tulai mai le sui usufono i lou avanoa mulimuli lenei.

Tofa Levaopolo Talatonu: O lea foi la ua toe talapipi lava e le Afioga i le Minisita le tulaga o le fautuaga lea sa avatu. Ae mo le silafia e lau Afioga, o le tolu ai lenei o tausaga o lauga lava ma faamalamalama e le Afioga i le Minisita tulaga ia. A o le faatinoga la, e tele lava le faaletonu. A lea e maua mai i le Lipoti a le Fale Faamamatoto. O lea foi e maua mai i le Lipoti o le Tala Faatatau Faaopoopo o le Tupe lea na fai nei, e \$1miliona faaopoopo i le tele o mai, increase. O le mea la lea na ou fai atu ai, o le manaia ia o le folasaga ae le o tino mai se faatinoga.

FOFOGA FETALAI: Malie lau Afioga i le Minisita, se i tulai mai se mea fia faamalamalama i le saunoaga a le sui usufono.

Tofa Aveau Tuala Lepale Niko Palamo: Lau Afioga i le Fofoga Fetalai, faafetai o lea ua oo le saunoaga a le Minisita i le mataupu sa ou fesiligia.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O lea ua saunoa le Minisita i auaunaga taitasi lea e faatino i le taimi nei, lea sa ou fesili i ai, po o le Foundation la lea o le a tuufaatasi ai auaunaga ia, aua e le o po se lilo, o auaunaga uma lava lea e saunoa i ai le Minisita, o la e faatino i le taimi nei. E le manaomia se Foundation e faatino ai auaunaga ia. O lea la ua ou fesili i ai, po o auaunaga taitasi la ia lea e faatino e le Matagaluega e uma le isi vaega lea pei ona ou fai atu ai i le taimi ua fano, po o le vaega lena o le a faatino e le Foundation i lalo o le lala e tasi?

FOFOGA FETALAI: Malo. Ia tulai mai le Minisita e faaauau lau tali mai.

Afioga Hon TUITAMA TALALELEI TUITAMA: E pei lava o le timuto i le patua o le pato. Ua ou fiu e faamalamalama nei tagata sole e le malamalama.

FOFOGA FETALAI: Malie se i tulai mai le Afioga i le Minisita mo Faatoaga ma Faigafaiva.

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai, se ua ta alofa lava i si ota uso lea e i ou tafatafa, faamalamalama, faamalamalama. Ou te manatua ai le fonu a le isi nuu na fai, e faamalamalama atu lava e le toeaina ae omai lava i le atoa matai laiti. Fai mai le toeaina, ‘Oooh! fool one, fool two, fool so’o.’

FOFOGA FETALAI: No more fool. Ia, tulai mai lau Afioga i le Minisita.

Tofa Levaopolo Talatonu: Lau Afioga i le Fofoga Fetalai, o le tala a taulelea laiti sa fai i le toeaina, o le fool. Ia, e leai se fool i le matou itu.

FOFOGA FETALAI: Ia, onosai ia, na o le flu le mea lea o le a oso mai i le tou faalavea soo. Ia, tulai maia lau Afioga e faai mai le saunoaga.

Afioga Hon TUITAMA TALALELEI TUITAMA: Lau Afioga, se i fai la sau tala leaga o lea e taua foi le fonu lea na ma o ai ma lau Afioga ma si ou uso a Minisita Lagolago i le tulaga lea o le suka. E pei lava ona ou taumafai e fai atu, tasi lea auala o lea e afua ai ona i ai ma le Afioga i le Palemia i totonu o le Tulafono lenei, le Fono Faavae lea. O Setema 2011, na oo ai le mataupu lea o faamai oti i le fonotaga a Malo o le lalolagi po o le United Nation Assembly. O le mataupu la lea sa focus i ai le atunuu ona o la e foi ua recognize e le lalolagi atoa, e fiu lava e lau tupe e togafiti ai mai, e le mafai ona faaitiitia, ae seiloga e togafiti i le mafuaaga o mai ia, faatoa maua lea o le course lea.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

Sa fesili la le uso lea po o... o lona uiga e maitau mai i le soifuaga o le tagata ma le taimi e maua ai e le suka, e le o se mea faapea e te suka ananafi ae togafiti nei uma lou suka. E leai, o le olaga atoa. O suiga la, takes time, but you have to make a change, you have to effect the change. If you do not do it now, e oo atu i le taimi e effect ai lau change ua hopeless, ua leai se aoga. Mo le faaitaiga la; o i ina i le fonotaga lena 2011 na fai ai le declaration a Malo o le lalolagi, lea e taua o le United Nation Political Declaration on NCDs. O lea la, o le aafiaga lena o lea e moomia e le lalolagi ia i ai taitai o Malo i totonu o le taumafaiga lenei. But without a political will, you will never be successful i taumafaiga ia e fai. O le mea foi lena o lea e ala ai ona apo tele e le Matagaluega leni SPAGHL, ona o le faalapotopotoga o taitai o le Malo e auau faatasi i le taumafaiga lenei, aua e fiu e taumafai, e le mafai e le aufaigaluega e toatasi ona fai, se i vagana ua i ai faatasi ma le political will, le finagalo autasi o le Maota lenei e agai ii e tineia le faafitauli lea.

O le ogaoga la o le faafitauli lea o le a ou tau atu, i le taimi nei i le fonotaga lea sa ma o ai ma le Afioga i le Fofoga Fetalai, o le incidence o le diabetics la e ua i ai, e tusa e tasi le tagata e maua i le mai suka i le ono sekone. Every 6 seconds, somebody dies from diabetes. E 6 sekone maliu le tagata e mafua mai i aafiaga o le suka. A o le incident o tagata e maua i suka e tolu sekone ma maua le tagata i le suka i le lalolagi, faitauga na o le....o lona uiga e faaluaina tagata ua maua i le mai suka ae tasi le tagata maliu mai le suka o lona uiga la, afai e le faaitiitia tagata e maua i le suka o lona uiga e faapoopoina le anoanoai o tagata e maliliu i le suka, a le agai la, o le auala la lea e i ai le Tulafono lenei ma le faamalosi o le Tulafono lenei e taofiofi ai le tolu sekone lea o le suka, o le mea tonu lava a lea e agai i ai le Tulafono lenei, aua e le mafai ona suia i le toaga e....vaeatu lava le mamalu o le Maota ,i le toaga e aveese vae ua palagia e le mafai ona foia le suka i le toaga e taoto mai fatu e mafua mai ona o le suka, e le mafai ona foia le faatupulaia o le suka i le toaga e faamama le toto o i latou ua afaina fatugao ona o le suka, e le mafai, seiloga e agai ii i le amataga o le suka faatoa iloa lea ua i ai se suiga, puipui mai ai i latou ia, aua le oo i le faamama toto aua le oo e taoto le fatu, aua le oo e aveese se vaega o le tino ua afaina ua palagia ma fai ni vae faapipii, aua nei agai i ni wheel-chairs, o le taumafaiga lea, e le o tino mai i le sipelaina o mataitusi o le Tulafono le taua o le Tulafono lenei ao totonu o lo o afifi ai le lagona lena ma le faamoemoe o le tatou Malo pau lea o le auala e faasaoina ai a tatou tupe ia o lo o alu i le togafitiga o tagata.

Ma le isi mea, e le mamai uma tagata i se taimi e tasi. Afai foi e togafitia pe afa o tagata Samoa e mamai, e le mafai ona tatou o e mamai ae le mafai ona tatou togafitia le 200,000 o tagata i se taimi se tasi, ae mafai e le Tulafono Tau Faaofi lenei ona fautuaina le atunuu ina ia taofia le aafia o tagata i le mai lea; le 200,000 lea i le taimi e tasi.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O le eseesea lea o le taumafaiga lea, e mafai e le feau molimoli atu ia soo ai Samoa ona logo-i logo-a le atunuu i le tele o le ogaoga o le faamai lea ma puipui mai ai o latou soifua, ae le mafaia ona oo lau togafitiga i le 200,000 o tagata ia i se aso se tasi, o le eseesea lea.

Lau Afioga i le Fofoga Fetalai ta te fia tautala pea i lenei mataupu aua e le uma upu ma tala o le tulaga o lo o i ai nei le afaina o Samoa i le 1978, na susu mai ai se fomai faapitoa mai Ausetalia o le diabetic clinic i Ausetalia o Pause Shumet ma faia le survey i totonu o Samoa, o iina lea na fafagu ai tatou, vaai Samoa o lea ua e laa atu i le tulaga faigata i le aafia o ou tagata, ia taumafai ia amata ona fai ni puipuiga mai le aafia o tagata mai le mai suka ma le toto mauuluga, taimi lena na o le 7% tagata o tatou sa mai suka, o le survey lea na fai nei e tatou i le tausaga lenei e 23% tusa lea ma le 40,000 tagata Samoa lea ua mai suka i le taimi lenei ma toto mauuluga.

O le agaga lea lau Afioga i le Fofoga Fetalai e molimoli atu ai le faatauaina o lenei faamoemoe, ia tatou silasila i le tulaga o le gasegase o le faaititia foi lea o le tatou tamaoaga e maumauina ona o togafitiga e agai i aafiaga o faamai nei, ae sili ona taugofie pe a tatou agai e taofi le mai ia aua nei afaina o tatou tagata.

Lau Afioga atonu o se feau taua lea e molimoli atu e avea ai lou avanoa e faamalamalamaina o mataupu na laga mai, ia nofofale ia Satuiamaa i tulaga o finagalo ma le tofa mamao i totonu o le Maota nei, tatou galulue faatasi tatou te agai e faasoina o tatou tagata mai mafatiaga o nei mai fita.

Ma le faaaloalo lava.

FOFOGA FETALAI: Faafetai i le saunoaga malamalama i lau Afioga i le Minisita ma e manatu foi o le itu taua ua matua manino ma malamalama ai i le folasaga a lau Afioga ona o lenei Tulafono taua. E faafetai atu foi ona o tulaga o avanoa o au nei o le Taitaifono o le tatou SBGHL o lo o maua ai pea le avanoa ta te malaga faatasi i nei malaga uma.

Na o le faaopoopoga laititi lau afioga o le tatou fono i Finland na faataua ai e le Malo aufaatasi le political world ma le health in all policy, o lona uiga so o se policy a le Malo fou e fauina e tatau lava ona aafia le tulaga o le soifua maloloina, o le ala foi lea na tuu mai ai le fautuaga sili faafetai o lea ua maua ua talia, o le aafia o le portfolio o lalo o le tulaga o le Soifua Maloloina i le vaavaaiga loloto a soo se palemia o se atunuu, o le agaga taua lena o lea ua maua, o lea ua fitoitonu ua sagatonu lau o le fo i le faatauaina o le tatou Promotional Bill ina ia mafai ona faataua i lalo o le vaavaaiga a le taitai o le Malo ona o lenei mataupu e le o se mataupu e tatau ona tatou fetagofi faatumutumulima pe tatou te faatemeteme i ai. O le itu ma le lipoti sili ona logona e le atunuu, e tolu sekone ua mai le tagata, ae ono sekone ua maluu le tagata.

17 TESEMA 2013

**Tulafono Tau Faaofi o le Faalapotopotoga Faavae e Uunaia le Soifua
Maloloina Lautele 2013 – faitauga faalua**

O le fua lena o lea ua tatou i ai i le saosaoa, ae faafetai o lea e molimauina tatou te lei oo tele i le tulaga o le fesopoai o tui e tui ai le tagata i le olaga atoa ma nisi o tulaga e sili ona ogaoga, ae faafetai o lea ua amata mea ma le faatulai mai o lenei Tulafono e manatu o le a foia ai le tele o lenei faafitauli.

Na faamaonia le lafo ma faitauina le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Nuu, Afioga ma Agafesootai mo le iloiloina ma toe lipoti mai i le Fono Aoa o se Fonotaga o lumanai.

**TULAFONO TAU FAAOFI O TEUTUEGA O LE TULAFONO O
ELEELE, FUAGAFANUA MA LE SIOSIOMAGA 2013
– faitauga faalua**

FOFOGA FETALAI: Mo le silafia e lenei Palemene o le Tulafono Tau Faaofi leni sa faia lona faitauga muamua i le aso 08 Oketopa 2013. Tulai mai lau Afioga i le Minisita mo Eleele Fuagafanua ma le Siosiomaga.

Tofa Hon FAAMOETAULOA ULAITINO FAALE TUMAALII (Minisita mo Punaoa Faanatura ma le Siosiomaga): Lau Afioga i le Fofoga Fetalai faapea le mamalu o Sui Usufono o le Fono usu a Samoa. Ae ou te lei faatu le lafo, e ao lava ia te au o le Minisita o le Matagaluega o le Punaoa Faanatura ma le Siosiomaga ma le Vaaitau ona avatu se faamaisega po o se faamafanafanaga i le faletua ia Peseta Makerita Malua faapea le nofo a alo aemaise foi o aiga na lua i le usugafono a le tofa ia Taulealea Laavasa Malua e pele i aiga na lua. E ao foi ona ou faamafanafana atu i le Matagaluega i le staff po o le aufaigaluega a le Punaoa Faanatura po o le Siosiomaga ma le Vaaitau, i le toesea o le tofa ia Taulealeausumai Laavasa o le sa nofoia le nofoa o Tavita i le taitaiina o le Matagaluega i tausaga e lima ua mavae atu, o lea e faamaise atu ai i le aufaigaluega i lo latou loto faanoanoa ona o le tuua o le malo e le tofa ia Taulealea. O lau tatalo lava o au o le Minisita ia pau se toa ae toe tu se toa e pei o lenei auauna lelei i le faatinoina o ona tiute mo le Malo e auala atu i le tulaga o le Pule sili. Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Eleele Fuagafanua ma le Siosiomaga 2013 i lona faitauga faalua ma ou te fia tautala faamalamalama i ai.*

17 TESEMA 2013

**Tulafono Tau Faaofi o Teuteuga o le Tulafono o Eleele, Fuagafanua
ma le Siosiomaga 2013 – faitauga faalua**

Faaluaina e le Minisita mo le Soifua Maloloina, Minisita mo Aoga, Taaloga ma Aganuu ma le Minisita mo Galuega, Felauaiga ma Atinae Esee.

FOFOGA FETALAI: Tulai mai lau Afioga i le Minisita e saunoa faamalamalama.

Tofa Hon FAAMOETAU LOA ULAITINO FAALE TUMAALII: Lau Afioga i le Fofoga Fetalai e laititi lava ni teuteuga o le Tulafono autu o le Tulafono lea o Eleele Fuagafanua ma le Siosiomaga 1989. O le faamoemoe lava o le Tulafono Tau Faaofi le teuteuina lea o le faaogaina o fua o le aoga o le lisi mo le fuafuaina o totogi o le lisi toe faafouina i lalo o le Tulafono Autu, pau lava lea o le teuteuina ona o le tulaga e i ai atinae e tatau lava ona iloilo ina le tulaga o Tupe Maua i le faagasologa e tai pei o faletalimalo ma tulaga faapena, o le auga lena o le Tulafono lena e pei ona avatu. Ma lou faaloalo lava.

FOFOGA FETALAI: Malo. E manatu ua malamalama le saunoaga a lau Afioga i le Minisita. O lo o i ai le avanoa i se sui usufono, ae a leai o le a tuuina atu loa le tatou Fesili.

Ia tulai mai lau Afioga i le sui usufono mo Aana Alofi Nu. 3.

Afioga TOE OLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, faafetai atu foi i le Afioga i le Minisita mo le Tulafono Tau Faaofi.

Ae muamua lau Afioga i le Fofoga Fetalai e fia piiiama foi i le Afioga i le Minisita e tusa ai foi o le ao pogisa o lo o i ai le Matagaluega ona o le valaau paia o le tatou Tapaau i le lagi i se tasi foi o Pule Sili o le Matagaluega le Tofa ia Taulealeausumai Tuifuisaa Laavasa o se tasi foi o uo ma paaga, e le gata i lea a o se tagata taua ma galue malos. E talitonu le agaga ua tele foi lona sao i le Matagaluega aemaise lo tatou atunuu i le taimi a o feagai ai ia i le tauaveina e le gata i le Matagaluega a o nisi foi o vaega o le Matagaluega sa faapea ona galue ai, tau ina ia faamaise lo tatou Tama i le tina ia Peseta aemaise o le fanau.

Lau Afioga i le Fofoga Fetalai ona ou see mai ai lea lau Afioga i le Tulafono Tau Faaofi, e talitonu o se vaega taua foi lea. Pau le vaega lau Afioga i le Fofoga Fetalai e fia maua ai se malamalamaaga, ona e tusa ai o le Tulafono ua faapitoa na o lisi mo hotel, ae pe faapefea ia nisi foi o atinae fuafua e le gata o faatoaga, ia o nisi foi o atinae faapea e ono mafai ona vaavaai i ai le Malo aemaise lava o le talitonuga o le tele o nisi o fanua o lo tatou Malo o lo o i ai, atonu o nisi o eleele e aoga tele mo faatoaga tetele. E fai foi o le agai i luma o le atinaeina lea o le tatou elele.....

*17 TESEMA 2013***Tulafono Tau Faaofi o Teuteuga o le Tulafono o Eleele, Fuagafanua
ma le Siosiomaga 2013 – faitauga faalua**

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O lena o lo o manino lava i lalo o le 3(b), se isi lava lisi e tusa ai ma Tulafono Faatonutonu. O le agaga e pei ona saunoa i ai le Afioga i le Minisita i le tulaga moomia ia i ai le tulaga foi lea fetalai i le faatinoina o le tatou galuega ia faafaigofie. O le uta a le potu ia fetalai. O le auau ato lava lena o le mea leni ina ia faafaigofie ai le tulaga tau lisi i le itu lea o galuega faatino i le uunaia o le atinae leni e taua tele mo Samoa ae faapea foi ma nisi atinae ua manatu le Malo ua faatauaina e pei ona faaoga i ai le Tulafono Faatonutonu. O lea la o lo o aafia ai le mea lea o lo o laga mai e le sui usufono.

FOFOGA FETALAI: Ia, e manatu ua malamalama le finagalo o le sui usufono. Tulai maia lau Afioga i le Minisita, e i ai se isi au faamalamalama faaopopo a o lea o le a tuuina atu le tatou fesili.

Tofa Hon FAAMOETAU LOA ULAITINO FAALE TUMAALII: E leai se isi faamalamalama, o lena e avatu sao lava i lalo o le 75A(b) lena e pei ona saunoa i ai le Afioga i le Palemia. O loo i ai nisi vaega o lisi e lavea ai foi i le vaega lea.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Eleele, Fuagafanua ma le Siosiomaga 2013 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloilo ina ma toe lipoti mai i le Fono Aoao i se Fonotaga o lumanai.

**TULAFONO TAU FAAOFI O TEUTEUGA O LE TULAFONO O
SOLIGATULAFONO TAU LEOLEO 2013 – faitauga faalua**

FOFOGA FETALAI: Mo le silafia e leni Palemene o le Tulafono Tau Faaofi leni sa faia lona faitauga muamua i le aso 8 Oketopa 2013. Tulai mai le Minisita mo Leoleo ma Falepuipui.

17 TESEMA 2013

**Tulafono Tau Faaofi o Teuteuga o le Tulafono o Soligatulafono
tau Leoleo 2013 – faitauga faalua**

Afioga Hon SALA FATA LISATI PINATI (Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafluasei): Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Soligatulafono Tau Leoleo 2013 i lona faitauga faalua ma ou te fia tautala faamalamalama i ai.*

Faaluaaina e le Minisita mo Galuega, Felauaiga ma Atinae Eseeese ma le Minisita mo le Soifua Maloloina.

FOFOGA FETALAI: Tulai mai lau Afioga i le Minisita e saunoa faamalamalama.

Afioga Hon SALA FATA LISATI PINATI: Lau Afioga i le Fofoga Fetalai, o lenei Tulafono Tau Faaofi e tasi lava le Teuteuga o lo o faapea ona faataatia mai ai, o le Soloia o le Tulafono Tau Faaofi i le Fuaiupu 18 o le Tulafono o Soligatulafono Tau Leoleo 1961. I le maea ai pe a pasia lenei Tulafono Tau Faaofi, o le a avea ai ma Tulafono Tau Faaofi o Teuteuga o le Tulafono o Soligatulafono Tau Leoleo 2013. Ma o lo o faamanino atili mai e le Tulafono Tau Faaofi lenei, ina ia le toe tuuina atu e le Komesina o Galuega Tau Leoleo ma Falepuipui se laisene i so o se tagata e fealuai solo ma faatauina atu oloa. O lenei tulaga o le a taofia ai le toe faatinoina o ia galuega tauave e faasino i le tuuina atu o laisene tau pisinisi. Ma lou faaloalo lava.

FOFOGA FETALAI: Malo faafetai. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ina ia malamalama atili i le gagana faa-Peretania, o lona uiga o le a le toe laa i ai leoleo ae lafo pea i le vaega o lo o nafa ma le faia o laisene o mea tau pisinisi, ae aua ne i toe aafia ai fua leoleo.

FOFOGA FETALAI: Malo faafetai. Ia se i tulai maia lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, o le fesili pe aisea o le a le toe faia ai laisene o nai tagata nei.

FOFOGA FETALAI: Malie le Taitai o le Itu Agai se i faamalamalama atili atu.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le ala lena na ou tulai atu ai ona e le o manino lau Afioga le mataupu lea.

17 TESEMA 2013

**Tulafono Tau Faaofi o Teuteuga o le Tulafono o Soligatulafono
tau Leoleo 2013 – faitauga faalua**

O lea e sau i lalo i le faa-Peretania, avoid duplication of funds. O lona uiga, o la e foi e fai e le vaega lea a le Inland Revenue. E leai la se mea e toe tau aapa ai fua leoleo ma le tele o mea e tau fufulu.

FOFOGA FETALAI: Ou te manatu ua malamalama le mataupu.

Afioga Hon PALUSALUE FAAPO II: E taua tele le galuega a leoleo i le tulaga lea o le faatonutonuina i le feoi o tagata nei, aua e moni lava e totogi le laisene faapisinisi, ae o leoleo lava e faatinoina le uunaia o le galuega.

FOFOGA FETALAI: O lea ua maua le finagalo o le sui usufono. O lea ua maua mai le tali.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o tatou Matagaluega uma lava, a oo loa lava ina moomia e so o se Matagaluega leoleo e faatino se soligatulafono ua fai, ona ave lea i leoleo latou te faatinoina. O lona uiga, e le o taofia le galuega a leoleo o le o e faatino le Tulafono ua soli. Na pau lava lea o le mea, o le isi tiute lea o lea e fai pea e leoleo, a o la e foi e fai i o i le Inland Revenue, tuu pea lava i le Inland Revenue e fai e latou, ae soia le toe faalua fesasi atu ai ma latou e tele ai le mau faaletonu e tulai mai.

FOFOGA FETALAI: Ia, tulai mai le sui usufono mo Faasaleleaga Nu.2 mo le avanoa mulimuli.

Susuga PAPALII LIO FAAVAIVAIVOMANU TAEU MASIPAU: Faafetai mo le... E talitonu foi o lea ua manino le saunoaga a le Palemia i galuega ia o le faatau savali. Ia manatua foi le tatou Tulafono tuai lea ua suia nei, na o meataulima a le tatou atunuu. E le aafia ai le tele o oloa lea e faatau savali nei. O le uiga la o sau faamatalaga, faafetai o lea ua aafia mea nei, o lae ua i o i le ofisa e fai ai laisene ma mea faapena, ae pe o aafia ai ma oloa ia e feoi ma nai a tatou... e i ai lava nai isi tagata ia e faamoemoe faapea e tau maua pei o oloa a kamupani ma mea faapena, ae faaoga ai foi o latou taimi. Ou te le iloa pe o aafia ai foi i laisene ia i le vaega lea e faia laisene, ona e fesoasoani foi i nai ia tagata aua o le tele lava o isi tagata ia, e pei e nonofo iinei i Apia ae faalagolago i nai mea ia mo le faatau atu e maua ai a latou tupe. Ia faafetai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: So o se mea lava tau pisinisi, e tatau ona fai laisene, ma e tasi lava le mea e fai mai ai laisene, o o i le Inland Revenue.

17 TESEMA 2013

**Tulafono Tau Faaofi o Teuteuga o le Tulafono o Soligatulafono
tau Leoleo 2013 – faitauga faalua**

FOFOGA FETALAI: Malo faafetai. Ia, e manatu, e i ai sau tali faaopopo lau Afioga i le Minisita? O le a tuu atu le tatou fesili.

Afioga Hon Sala Fata Lisati Pinati: Lau Afioga e leai, faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Soligatulafono Tau Leoleo 2013 i lona faitauga faalua.

FOFOGA FETALAI: E tusa ai ma le Tulafono Tumau 132, o le a tuuina atu le Tulafono Tau Faaofi i le Komiti o Mataupu Tau Faamasinoga, Leoleo ma Falepuipui ma le Faamasinoga o Fanua ma Suafa mo le iloiloaina ma toe lipoti mai i le Fono Aoa o se Fonotaga o lumanai.

Ia, e manatu leaga o lea ua tatou tulalata i le tatou taimi o le malologa o lenei aso. E i ai le lagona ua tataua ona fai se tatou malologa, e le tataua foi ona umi le tatou Fono i le aso a taeao ona o lea ua tatou tulalata i le tulaga o malologa, aemaise foi le lafo atu o le faamoemoe o le tatou Palemene mo le faitauina o le Tala o le Tupe. Ae o lo o i ai se faasilasilaga aloaia ona o le manatu o lo o i ai le faaaloalo i le afioaga o Satapuala o lo o i lumafale, ona i ai lea o le talitonuga, o le a tatou faia se malologa...

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se ua ou toe faamanatu atu i lau Afioga, e leai se faamoemoe e toe usuia se tatou Fono i le aso a taeao, o nei lea e i ai le agaga e faamuta ai a tatou galuega, ona o lo o i ai foi tiute o lo o feagai ma le Malo i le tulaga o le vaiaso puupuu le vaiaso lenei.

FOFOGA FETALAI: Ia, faafetai atu i lau Afioga i le Palemia. E manatu o lea ua agiga i malae le finagalo o le tatou Malo ona o nisi o tulaga ma tulaga le maalofia i le faatinoga o tiute o le Afioga i le Palemia ma le Kapeneta. O lea e manatu ai o le a taatia ese a tatou galuega mo le isi a tatou Aso Fono o lumanai ai ona faasolo ai lea o tatou polokalame e pei ona masani ai. E pei o i ina lea sa tuu atu ai le agaga mo le faaavanoaina o le taimi e tusa ai ma le lipoti o le tupe o lo o agiga nei i le Maota, ae na avatu pea le faamuamua i le aso ona o nisi o galuega tuua ma galuega e tataua ona faamaeaina ona o le tulai mai o Tulafono ua tataua ona pasia ma tuuina atu i le Maota.

A o le i faaiuina le Fonotaga i lenei aso, e momoli atu le faafetai tele i le paia ma le mamalu o le tatou Maota, mai lava i le taeao analeila i le tulaga o le tatou Fono Tatalo. E momoli atu le agaga faafetai tele ona o le faatasi mai ona o le manatu i le Atua ma Lana faatufugaga ua tatou aulia ai ma le manuia le faaiuga o a tatou galuega o lenei tausaga.

17 TESEMA 2013

**Tulafono Tau Faaofi o Teuteuga o le Tulafono o Soligatulafono
tau Leoleo 2013 – faitauga faalua**

O a foi upu faalaciau ma tala na saunoa i ai le paia ma le mamalu o le Auaigaluega Paia a le Atua, tau ia ina ia tau ma lafo i le Atua soifua, o Ia e taitaiina lo outou soifua manuia aemaise lo outou soifua auauna, aua le faaauuina pea o le tatou galuega mo le lumanai aemaise le tatou aulia atu o le tausaga fou.

E momoli atu moomooga alofa o le Fofoga Fetalai i le paia ma le mamalu o le tatou Maota i ona tulaga faalupelupe a o tatou alo i faiga malologa. Ia alofagia e le Atua ia aualiitia mea uma i Lona alofa ma Lona agalelei ina ia taitaiina lo outou soifua manuia ina ia tatou maua se faiga malologa fiafia, saogalemu, manuia ma le faamanuiaina. Ia tatou toe potopoto i se Aso Fono o le a tuupoina, aemaise o le faaauuina o le tatou galuega mo le tausaga fou.

I le lafo na faatuina i le taimi ua sola ma fatia ua alu e pei o le faatufugaga na fai ai e le Fofoga Fetalai, o le aso ua faatinoina ai le faamoemoe o le nuu o le Afioga i le sui usufono mo Aana Alofi Nu.3. O lea e talosaga atu i le paia ma le mamalu o le tatou Palemene, a maea le tatou Fonotaga i lenei aso, ona tatou auai faatasi atu lea i lumafale o lea ua affio mai le paia i le Saoalii ma le affio o Satuala, le paia i le Vaili aua le tootoo o Maauga, le Vainalepa ma le Lauti na Laulelei ma upu ia te Oe le Faleaana. Ia sei tatou vaavaai i tiuga ma faaaloaloga i le aso ua alo i ai le Afioga i le sui usufono ma lona itumalo. Ae ou te tuuina atu le avanoa lenei mo le lafo i lau Afioga i le Palemia.

LAFO MO LE TOLOPOINA

Susuga Hon TUILAEP A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo, o lea ua e saunoa i le faamoemoe o le tatou Fonotaga ma le lafo, *Ina ia tolopoina nei Galuega a le Fono Aoa seia aulia le aso 21 Ianuari 2014 e tusa ai ma le Polokalame o Fonotaga a le Palemene ua uma ona faataatia 2013/2014.*

Ma a o le i aumaia le fesili, e avatu foi le faamalo, o lena ua e saunoa faamalo i le Maota. O le mea moni e ui lava ina puupuu lenei taeao, ae ua lima Tulafono Tau Faaofi tetele ua maea ona tatou faamaonia le faitauga faalua. O se galuega tele foi sa faafeagai ma a outou Afioga. Ma o le mea moni lava, o lo o tele isi a tatou Tulafono Tau Faaofi, e le taumatea o le a alofaiva i ai le mamalu o le Maota ia tapena ai mo le toe usuia o le tatou Fonotaga i le aso 21 e pei ona i ai le faamoemoe. A o le faafetai lena ua saunoa i ai le Afioga i le Fofoga Fetalai, o le faafetai foi lena a le Malo i lenei taeao fou i le affio mai ma tala mai aao e faatino le tatou galuega, ae tatou te le i agai atu i malologa o le kerisimasi. Ma o le agaga foi lena, ia tatou taufai maua uma se Kerisimasi fiafia ma se Tausaga Fou manuia. Ia soifua ma ia manuia.

17 TESEMA 2013

Lafo mo le Tolopoina

Faaluaina e le Sui Palemia, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo.

FOFOGA FETALAI: A o lei tolopoina le tatou Fono, ou te talosaga atu i lau Afioga i le Sui Fofoga Fetalai se i faaiu mai le tatou Fonotaga i se tatalo.

Tatalo.

Na tolopo Taulumaga a le Fono Aoao i le itula e 1:05 i le aoauli seia aulia le itula e 9:00 i le taeao o le Aso Lua, 21 Ianuari 2014.